

四庫全書

史部

欽定四庫全書

史部

江西通志卷八十一

詳校官監察御史_臣范衷

檢討_臣德生覆勘

總校官知縣

_臣

楊懋珩

校對官編修

_臣

沈清藻

謄錄監生

_臣

羅翺遠

欽定四庫全書

江西通志卷八十一

人物十六

撫州府二

元

吳澄字幼清撫州崇仁人所居當華蓋臨川二山間望
氣者徐覺言其地當出異人澄生五歲日誦千餘言
夜讀書至旦母憂其過勤節膏火不多與候母寢燃

火復誦習既長於經傳皆習通之知用力聖賢之學
嘗舉進士不中樂安鄭松招澄居布水谷乃著孝經
章句校定易書詩春秋儀禮及大小戴記程鉅夫奉
詔求賢江南起澄至京師未幾以母老辭歸行省掾
元明善以文學自負嘗問澄易詩書春秋奧義歎曰
與吳先生言如探淵海遂執弟子禮擢應奉翰林文
字有司敦勸久之乃至而代者已到官澄即日南歸
未幾除江西儒學副提舉居三月以疾去官召為國

子監丞陞司業嘗為學者言朱子於道問學之功居多而陸子靜以尊德性為主問學不本於德性則其弊必偏於言語訓釋之末故學必以德性為本庶幾得之議者遂以澄為陸氏之學非許氏尊信朱子本意然亦莫知朱陸之為何如也英宗即位遷翰林學士泰定元年初開經筵首命澄與國子祭酒鄧文原為講官會修英宗實錄命總其事居數月實錄成未上即移疾不出中書左丞許思敬奉旨賜宴國史院

仍致朝廷勉留之意宴罷即出城登舟去中書聞之遣官驛追不及而還詔加資善大夫澄身若不勝衣正坐拱手氣融神邁會問疊疊使人渙若氷釋早以斯文自任故出登朝著退居於家與郡邑之所經由士大夫皆迎請執業而四方之士不憚數千里躡屨負笈來學山中者嘗不下千數百人少暇即著書於易書春秋禮記各有纂言作學基學統二篇使人知學之本與為學之序尤有得於邵子之學校定皇極

經世書又校正老子莊子太元經樂律及八陣圖郭
璞葬書初澄所居草屋數間程鉅夫題曰草廬故學
者稱之為草廬先生天歷三年朝廷以澄耆老特命
次子京為撫州教授以便奉養明年六月得疾有大
星墜其舍東北卒年八十五封臨川郡公謚文正孫
當自有傳

元史

按草廬先生出處大節詳見虞道園所撰行狀及
揭文安奉詔撰神道碑中

曾沖子字聖和淵子弟至元中程鉅夫奉詔求賢以沖
子應授福建提刑司僉事時閩部遠且險吏乘為奸
民迫為亂沖子行部警諭感切民畏而懷之以奉議
大夫致仕

人物志

詹崇朴字叔厚樂安人經義貫融宋末舉進士不第大
德中夏友蘭建鰲溪書院吳文正公請崇朴主其教
學者多所成就所著有厚齋奎光集

林志

虞集字伯生宋丞相允文五世孫集生三歲即知讀書

仁宗朝以薦授翰林待制兼國史院編修嘗嘆曰儒
者皆用矣惟虞伯生未顯擢耳英宗即位拜翰林學
士兼祭酒即除奎章閣學士纂修經世大典中丞趙
安世為請外任帝怒曰一虞伯生汝輩不容耶龔伯
璣以才俊為馬祖常所喜亟稱之欲集為薦引集不
可文宗崩謝病歸伯璣後以事敗世乃服其知人元
統二年遣使召還疾不能行卒年七十七早歲與弟
槃同闢書室左室書陶淵明詩題曰陶庵右室書邵

堯夫詩題曰邵庵故世稱邵庵先生

元史

按虞集謚文靖所著有道園學古集史傳皆不載
虞集字仲常延祐進士授吉安永豐丞除湘鄉州判官
有巫至其州稱神降告其人曰某方火即火又曰明
日某方火民以火告者集皆赴救至達晝夜告者數
十寢食盡廢縣長吏以下皆迎巫至家厚禮之又曰
將有大水且兵至州大家皆盡室逃集得劫火卒一
人訊之盡得巫黨所為坐捕盜司召巫至鞠之無敢

施鞭筆者槃謂卒曰此將為大亂安有神乎急治之
盡得黨與數十人羅絡內外果將為變者斷巫并其
黨如法一時吏民始服儒者為政若此秩滿除嘉魚
縣尹槃已卒槃幼時嘗讀柳子厚非國語以為國語
誠可非而柳子之說亦非也著非非國語時人已歎
其有識詩書春秋皆有論著而春秋乃其家學故尤
善讀吳澄所解諸經義輒得其旨趣所在澄亟稱之
同上

何中字太虛樂安人少穎拔以古學自任家有藏書萬
卷手自校讎廣平程鉅夫清河元明善柳城姚燧東
平王構同郡吳澂揭傒斯皆推服之至順二年江西
行省平章全岳柱聘為龍興郡學師明年六月以疾
卒著有易類象二卷書傳補遺十卷通鑑綱目測海
三卷知非堂藁十七卷

同上

按世所傳何太虛集止存詩二卷而已

孫轍字履常其先自金陵徙家臨川轍幼孤母蔡氏教

之知警策自樹立比長學行純篤家居教授考德問業者日盛與人言一以孝弟忠信為本辭溫氣和聞者莫不感悟待親戚鄉里禮意周洽未嘗及人過失士子至郡者必來見部使者長吏以下仁且賢者必造焉轍樂易莊敬接之以禮言不及官府憲司屢辟皆不就江西行省特以遺逸舉轍一人轍善為文章吳澄嘗序其集曰所謂仁義之人其言藹如也其見稱許如此年七十有三卒於家

同上

繆穆字舜賓崇仁人咸淳中以賦舉第一博記覽談論輒傾四座遊李梅亭之門傳其詩學樂府詩律皆工吳文正序其集復銘其墓所著詩文及書經漫鈔行於世

人物志

饒宗魯字心道臨川人性孝友生五歲母歿事繼母孝養備至隱居不仕天歷二年大旱鄉人乏食死者相藉發廩賑之所活甚衆所著有易傳庸言等集

林志

按饒宗魯嘗輯所聞於曾子良語為周易輯說

夏友蘭字幼安樂安人事母以孝謹聞從草廬先生學
大德中建鰲溪書院捐田五百畝以贍學者行省薦
於朝三覲仁宗於潛邸賜書院額授會昌州同知辭
人物志

吳定翁字仲谷臨川人從曾平山學又學詩於甘泳之
吳草廬揭曼碩皆亟推之薦辟不起年幾九十卒

林

志

葉采英臨川人天性妙悟嘗云黃鍾九寸之管無定論

隨所置律而上下損益以為聲均存而律可辨矣宋
英自製譜曲均間合節趙子昂虞邵庵亟稱之欲引
入禁林議樂律而宋英已卒取所著曲譜及樂律遺
書上之人物志

王方貴字顯初樂安人授東湖書院山長遷江陽縣尹
除厚葬之俗獲收寔者千計遷韶州路經歷郡有萬
戶豪橫繩以法母老乞歸終養韶人立祠祀之著有

雲萍藁

同上

吳可孫字聖可金谿人咸淳進士授新昌尉用程鉅夫薦任建昌路教授秩滿歸餘粟千石有奇悉封識以

待來者

同上

周昂霄字翀之崇仁人至元間充濂溪書院山長工於聲律吳草廬嘉其行檢端嚴為作棲筠集序同邑有周陽鳳字伯清博學能文士多從遊者有山堂文集

同上

袁明善字誠夫臨川人師事吳文正公晚年教授於邵

庵之門自號樓山所著有征賦定考援引經傳言井田水利之法甚備經世之書也

道園學古集

黃極字建可樂安人師事草廬元統中南臺薦以不求聞達不起所著有西齋集子寶字仲瑤淹洽經史與何淑張潔王翊稱樂安四傑

人物志

涂潛生字自昭宜黃人邃於易學時行省鄉試額取二十三人潛生三舉上春官授贑州瀟溪書院山長所著有四書斷疑易義矜式等嘗行於世

同上

李榮臨川人至元初為行軍令史宜黃南坑盜起調兵
捕治議畫地以兵殲之榮抗議不可時內附未久守
吏率欲以威服衆軍中又利其子女金帛計皆出此
聞榮言變色主兵怒引弓射之榮曰殺我以活萬命
可也兵官愧悟納矢服中曰今當何如榮曰盜烏合
不能持久若良民豈不知逃死按兵勿動以誠意諭
之盜成擒矣主兵者從之獲盜卒年六十五著有參
政詩集周禮纂言及學言藁

元史

章迪字允德臨川人能文章有才畧吳當奉詔捕江西盜辟迪為行省檢校特劇寇胡志學據撫州民不勝其酷迪率兵討之志學戰敗伏誅一郡遂定左丞和尼齊忌其功召還省殺迪帳下寃之

林志

王孚遠字允德樂安人至正間揭傒斯薦授大同路學正壬辰兵亂傾家舉義糾集丁壯萬餘人夾柵樹寨保障鄉邑官兵勦賊孚遠出糗餉軍嘗獻策萬言條陳機宜十事和尼齊忌而殺之

人物志

朱夏字元會金谿人早遊草廬先生門杜門究心經史
草廬稱其為文不及於古不止濟南張起巖在江南
行臺辟憲司掾京兆賀某在相位薦入史館皆未就
至正中鄉寇起竟罹其禍所著有鳴陽集

林志

黃德字養德樂安人少穎敏於書無所不讀邃於天文
嘗論日月無左旋謂先儒蓋以理談理未嘗以象觀
理故其言如此草廬先生評樂安人物謂何黃齊名
指太虛也號同谷有文集

同上

黃紹字仲先臨川人博學有操守至正戊子鄉試尹靖
安縣壬辰兵變戢鄉兵為守禦計屢挫賊鋒糧盡為
賊所圍正冠危坐大罵而死

同上

婁起革臨川人兄南良宋咸熙戊辰進士次文輔元程
雪樓薦為石鼓書院山長起革力學有隱德揭曼碩
作詩述其救盲女事予志淳亦用雪樓薦任南岳書

院山長吳文正稱臨川家世首推婁氏

人物志

李本字伯宗榮孫從學於草廬草廬歿就學者皆依序

氏本與弟棟講明濂洛之學所居有環翠亭君子堂
虞邵庵皆為之記棟父李淵嘗三刲股療母疾輒愈
郡人以孝稱之

同上

李衡字元成崇仁人篤志春秋嘗著集說分二例一為
稽古設一為科舉設元末領鄉薦為太和州學正洪
武十二年以明經博學徵不就有文集數卷

同上

葛元詰金谿人弱冠有文聲登進士辟江浙行省掾以
大臣薦為本縣尹未幾兵亂路梗入福建省憲交辟

浮海北至大都而卒學者陳介搜其遺藁得詩文彙
為十卷元詰博學工文居官以善績稱門人蘇伯衡
舉河汾故事私定其謚曰文貞先生

林志

黎仲基名載以字行臨川人性端重嘗謁草廬於郡學
草廬喜曰期年所接無如君者數以薦歷官太平路
教授斬黃盜起嘗以奇策佐巴延取勝江上歸築室
瓜園洪武初再薦不起卒有瓜園集十卷

同上

陳介字彥碩遠祖原由汴徙金谿介性篤孝父昇登進

士為火你赤所殺介痛父非命詣闕懇寬得白時歲
當大比介留京師就試登進士授澠州同知治有能
聲築堤以捍水災民號陳公堤洪武初徵之介易姓
名姚東之以避徵有文集

同上

黃伯遠金谿人少從草廬先生學登進士除國子博士
元亡歸隱故山王英嘗作六賢詠謂葛元詰劉傑朱
夏陳介黃嘯及伯遠也

同上

徐通字泰甫樂安人性篤孝邑令胡世則趙與椿俱厚

禮之與岑遷欲攜至帥府以親老懇辭文信公欲用之亦辭至元中總管劉懷遠以邑大燬檄通攝尉事通欣然領之安輯流移收瘞胥牒郡守錄其勞績通謝去或問故曰本從吾邑起見非為功名地也吳文正時造其廬

安志

周信甫字以成崇仁人謙謹樸實適流寇至其里要索重賂信甫代貧民贖百餘家築艾陂通水利復與孫德甫各捐私田鑿溝洫溉官民田地八十餘頃歲收

所積平價活飢年八十二卒又同時金谿余受樂安

丘從學陳楚傑劉成德俱各以孝義著

安志

張紹撫州人學儒術尤明法律仁宗英宗朝命廷臣以古律合新書撰大元通制頒於天下紹當通制未成之時編錄詔條及議擬通行之例分隸六部題曰大元條例綱目殫心四十年其書可輔通制而行吳草廬為之序

吳文正集

張仕謙樂安人知婺源州至正間賊圍城四十餘日城

陷妻被執不從受害復加刃張頸以脅降仕謙曰為國死忠可急殺我至死罵不絕口事見姜碩昭忠錄

府志

黃雲撫州人寓靖安素勇捷至正十二年斬黃賊數萬來寇縣達魯噶齊綽哈扎拉台氏帥衆破賊以雲為前鋒雲每戰獨以身當敵為數十人所圍輒奮身躍出至是身中數十槍噴血罵賊而死

採元史綽哈扎

拉台氏傳後撰

藍光字仲晦臨川人與危素同受業吳澄孫仲謙叅江西辟光從事以功歷官福建行省都事因家焉素入明薦光謝病不起家居教授五十餘年以節終年九

十九

福建通志

何淑字伯善樂安人至正進士授武岡丞蘄沔盜起不果上洪武辛亥召為太子賓客辭不就六月特召天下名士九人淑居首固以老疾辭戊辰復遣幣徵先

一月卒

林志

按何淑所著有瓊庵集

吳儀字明善金谿人博極羣書海內兵起無意仕進遠
近學者爭集其門所釋皆五經大義尤精春秋著三
書曰春秋裨傳曰春秋類編曰五傳論辨多先儒所
未發雖盛暑隆冬必正容端坐學者稱東吳先生即
伯宗父也

人物志

劉傑金谿人至正進士歷官延安路總管尋為中書舍
人改監察御史累陞工部尚書集賢院學士致仕制

行甚高

明一統志

黃嘒字殷士金谿人博學明經善屬文尤長於詩用左丞相太平奏授淮南行省照磨未行除國子助教遷太常博士轉國子博士陞監丞擢翰林待制兼國史院編修官二十八年京城既破嘒歎曰我以儒致身累蒙國恩為胄子師代言禁林今縱無我戮何面目見天下士乎遂赴井而死年六十一有詩文傳於世

元史

姜碩字公碩樂安人累官禮部員外郎至正庚子奉詔
自海道入江楚招陳友諒至邵武遇偽指揮康宗碩
諭以朝廷意賊怒碩大罵之被害事聞贈禮部侍郎

謚忠烈

林志

饒介字介之臨川人自翰林應奉出僉江淞廉訪司事
張氏入吳杜門不出士誠慕其名自往造請承制以
為淮南行省參政介不能脫遂家采蓮涇上日以觴
詠為事張氏敗俘至京師死之姚廣孝稱其為人個

儻豪放書似懷素詩似李白氣燄光芒逼人志大才
疏而無所成為可惜也介自號華蓋山樵亦曰醉翁
著有右丞集

人物志

鄧彥誠金谿人世居雲林之陽元季天下大亂撫州不
守彥誠曰吾不可不衛宗人使及於難即召鄉里少
年分隊伍樹砦柵於雲林山金鼓之聲晝夜不絕寇
來輒敗縉紳依以免者百數十家事平會府上其功
將爵祿之彥誠謝不受乃於室之西偏日逍遙其上

人皆曰是功成而不居者宜名亭曰清風以勵衰俗

云
宋學士集

涂立可字允瑞宜黃人自曾祖以下三世皆宋貢士立可孝友恭讓一兄一弟早逝撫其孤教育冠婚之與己子無異士大夫往來南北者以獲交為榮築亭江臯俯臨遐眺扁曰小瀟湘又別營庵於先墓側題曰于斯後改曰塗山庵

據吳草廬集改撰

吳臯字舜舉臨川人宋履齋丞相六世孫早師吳澄得

為學之要文章森嚴有法教授臨江遂占籍焉號平齋有吾吾齋類藁從子均仲擢春坊中允所著有新

增復古編

林志

曾詠字師點樂安人至元間母因避地得疾昇歸值元兵至悍卒誣諸不賂已者為盜詠謀徙母深山中母不從詠佯為呻吟若與母同病者獲免時數民田詠主其事履畝肥瘠高下無錙銖私何太虛為立傳

同

上

孟君用字和卿臨川人至元間兵掠臨川君用生甫三
歲母章氏負以逃亂兵及之章哀號請死以存子甫
置子於地身即被驅不得顧兵既過孟氏得君用歸
養之竟不知母所往稍長聞其事遂習蒙古言語文
字將極北方求之十年不得還至臨川客有知母所
在者君用往求則母已歿號慟墓下得其遺衣以還
葬焉虞邵庵為之立傳

同上

曹孟仁宜黃人至正壬辰之亂弟仲容舉義旗壓孤嶺

深入為叛民所殺孟仁盡用其產以募士前後破賊

無數涂守約為立傳

同上

趙均保臨川人至正壬辰之亂撫州幾陷均保與陳德

輝倡義散家財訓丁壯設計防禦時江西郡城皆陷

沒惟撫州境不遭其難

同上

李升字宗禮臨川人後徙餘干習泰鄉至正間項普壽

陷饒州升與章綸章黼集義兵迎敵當鋒者止九人

血戰大敗敵升好學治易為文立就卒死於戰

同上

鄧烈字季謨金谿人舉進士不第壬辰之亂金谿被害
尤慘鄧氏有思誠者合族人謀曰吾家世忠義豈可
為賊所制時盜屯縣治思誠焚其二砦俄而盜兵四
起烈與族子石力戰而死

同上

明

熊鼎字伯穎臨川人元末舉於鄉長龍溪書院兵亂結
鄉人自守陳友諒屢脅之不應鄧愈鎮江西數延見
奇其才太祖至愈以鼎薦欲官之以親老辭乃留愈

幕府贊軍事吳元年除中書考功博士遷起居注宮
殿成命編古人行事可為鑒戒者書壁間舍人耿忠
使廣信還奏郡縣官違法狀帝遣御史廉之而時已
頒赦書鼎偕給事中尹正進曰朝廷布大信於四方
復以細故煩御史失信且褻威帝默然久之乃不遣
洪武改元新設浙江按察司以鼎為僉事分部台溫
台溫自方氏竊據偽官悍將二百人暴橫甚鼎盡遷
之江淮間民始安寧海民陳德仲支解黎異妻屢

訴不得直鼎一日覽牒有青蛙立案上鼎曰蛙非黎
異乎果異止勿動蛙果弗動乃逮德仲鞠實立正其
罪山東初定設按察司復以鼎為僉事奏罷不職有
司數十輩進副使徙晉王府右傳坐累左遷多爾濟巴
勒率部落內附改鼎岐寧衛經歷賜白金寶鈔以行
既至知寇乃偽降密疏論之帝遣使慰勞賜以裘帽
復遣中使趙成召鼎鼎等既行寇果叛遣其下脅鼎
還鼎責以大義罵之遂與成及知事杜寅俱被殺帝

聞悼惜命葬之黃羊川立祠致祭

白志

周忠字伯厚金谿人洪武初召見奏對稱旨寵賜優渥
從征湖廣特命參謀左右獻太平十六策後使沙漠
不知所終

分省人物考

危素字太樸金谿人少通五經遊吳澄范梈門用大臣
薦授經筵檢討修宋遼金三史由國子助教遷翰林
編修纂后妃等傳遷太常博士歷官禮部尚書參中
書省事拜參知政事博囉特穆爾與庫庫特穆爾俱

平章總兵河南浙生魯端素建議用博羅為丞相治
四川庫庫為丞相治河南各責其成功順帝不能用
棄官居房山素為人侃直數有建白順帝令寫釋氏
書不可又諫罷刊行三藏經上都宮殿火敕重建大
安睿思二閣素諫止之請親祀南郊築北郊以斥合
祭之失居房山者四年明師將抵燕淮王監國起為
承旨素甫至而師入乃趨所居報恩寺入井寺僧大
梓力挽起之曰國史非公莫知公死是死國史也素

遂止洪武二年授翰林侍講學士訪以元興亡之故
詔撰皇陵碑稱旨坐失朝罷復官兼弘文館學士賜
小車免朝謁時素已七十餘他日帝御東閣開簾外
履聲索然問誰對曰老臣危素帝哂曰朕謂是文天
祥耳御史王著希旨論素亡國之臣不宜列侍從謫
居和州守余闕廟歲餘卒

白志

按曝書亭集貝瓊送危於憶赴安慶教授序稱洪
武三年識公於京師未幾公卒則學士未嘗銜命

守祠特其子於憶教授安慶好事者遂傳會有是言也

張子明東鄉人原籍安仁朱文正守南昌子明為輔陳友諒圍城時太祖居建康子明晝伏夜行求救太祖命速還堅守救兵且至啣命至湖口為賊所獲表以錦衣使招文正降子明佯許之及至城下大言曰賊命吾誘公降上傳諭堅守兵即至于不及同斬賊為恨賊大駭以梁刺之死友諒敗封侯爵謚忠節祀南

昌忠臣廟子仁杰蔭千戶

府志

張潛字以修樂安人工詩文元末鄉舉洪武初以賢良

薦不起有敬亭文集

安志

王經字孟遠金谿人松滋陳氏建墨濤義塾聘余太史

真主教經徒步二千里往傳二戴禮之學元末隱漆

溪洪武初徵拜理官時鋤剋吏弊悉用儒術選經為

隴西令卒著有金谿縣志禮記纂要唐詩評雜詩文

若干卷

分省人物考

吳伯宗名祐以字行金谿人洪武庚戌鄉薦舉首辛亥
廷對擢進士第一時開科之始得伯宗帝甚喜賜冠
帶袍笏授禮部員外郎與修大明日厯胡惟庸用事
欲人附己伯宗性剛直不肯相下惟庸銜之謫居鳳
陽伯宗上書論時政因言惟庸專恣不法辭甚剴切
帝得奏召還奉使安南得馴象方物以獻除國子助
教改翰林典籍帝製十題命賦援筆立就詞旨峻潔
帝稱曰才子賜織金錦衣除太常寺丞辭改國子司

業又辭忤旨貶涇縣教諭至淮安召還為翰林檢討
十五年進武英殿大學士坐弟仲實為三河知縣薦
舉不實詞連伯宗降檢討年卒於官所著有南宮
使交成均玉堂四集

列卿錄

曾堅字子白金谿人少與危素齊名元進士累官中大
夫洪武初入朝為禮部侍郎諳習典章太常議禮皆
諮之

白志

吳彤字文明臨川人用薦為國子監博士改嚴州同知

吳元年召還議即位郊祀儀注洪武建元擢僉湖廣
按察司上疏言事如沙汰荊州湖泊官省武昌等批
驗所復荊陝二州田額均公安諸縣水夫科繇之類
上皆從之遷北平副使有山居南遊諸集

同上

詹鳳翔字道存樂安人洪武進士以病免歸年已八十
手不釋書著有大學中庸章句語孟節要書經釋義
書傳旁通撮要家禮括要律呂新書括要理學類編
天體日道論彭蠡論及奎光堂文集

同上

傅匯字原宗金谿人洪武初纂修經史詔天下學博老
成者入祕閣匯被召預修書成卒於京師上聞訃遣
官賜祭其諭祭文有方資稽古以啓後人等語蓋御
筆也

同上

揭軌字孟同臨川人倅斯之後洪武初以明經舉知新
河縣有惠政秩滿歸作杏花春雨亭教授生徒復召
主江西鄉試校定書傳會選每以宿儒備顧問書成
賜金歸所著有新河集

林志

曾旦初名旭臨川人元末三舉解元以薦歷五經博士
召見問郊祀之禮條對無不稱善由是數承顧問除
禮部主事卒有文集宋潛溪序之同上

吳率正名澣金谿人洪武初舉賢良方正知武康縣嘗
被誣繫獄父老數百相率詣闕奏請復任上驗其實
給榜列名徧示天下以厲廉潔陞太原府知府以足
疾召至京師賜歸

人物志

張謙字伯恭臨川人洪武初以學行徵授司農丞奉使

山東閱郡縣庫藏金帛穀粟措置稱度報命加賜文綺白金尋出為化州同知孫士貞永樂進士任御史

同上

涂幾字守約潛生從弟博學善屬文尤工楚辭洪武初嘗擬進時事策上皇帝書有曰臣平生苦學見於文章製作盈几時輩妄推謂當與漢唐文人畧相先後書成會有疾不果上而卒所著有涂子類藁

同上

陸植字伯昂臨川人洪武四年以明經舉除華陽簿指

逃亡理誣枉以治最陞署丞卒年九十有詩集子煥
由賢人君子舉官至沂州知州以善政稱孫最由國
子生除監察御史陞交趾按察僉事撫綏有方陞貴
州左參政卒

同上

熊岳字具瞻鼎次子自少負氣積學悼其父之不幸奮
志思紹先緒初授嘉興府知事歷事兵科擢大理評
事使西南夷麓川緬甸皆稱上旨未竟其用而歿論
者惜之

府志

黎粲字希師臨川人由明經除南賓主簿莅事廉明隣
郡長寧近彝獠歲易五守皆為蠻逐詔以粲為知州
蠻賊解散歲餘戎州梅洞寧遠賊攻州城粲率民兵
出戰自朝至晡墮馬為賊所害州民祠祀之

林志

董子莊名琰以字行樂安人博學有操行洪武中以鄉
薦除雲南學官遷知茂名縣成祖擢為國子司業出
為趙王府右長史恭謹小心隨事匡正王多過帝輒
以責長史子莊夾持王愈堅永樂十八年春當陪祀

國社夙興正衣冠端坐而卒

白志

吳溥字德潤崇仁人洪武南省第一廷對第四授翰林修撰永樂初遷國子司業為人清慎嚴重造次以禮居官二十餘年操守如一日俸入悉以給親故及卒無以為殮有古崖集

同上

朱彥昌名弘祖臨川人善詩詞洪武六年以明經舉授荊州稅課不赴卒有東臯舒嘯集弟復心亦以儒士舉為岢嵐丞山寇嘯聚朝廷命將剿捕將屠其境復

心計擒首惡民得免時年七十無子妾忽生男人謂

陰德之報亦工詩律有敬所集

人物志

王時保樂安人洪武戊午薦舉歷陞刑部主事按治浙江山東決遣疑獄率多平反以事謫戍雲南御史閻

某疏其清苦召還有天涯芳草集

林志

鄒矩字元方宜黃人博學工文與涂幾齊名人稱鄒涂

洪武初以通經儒士薦有文集

人物志

喻德昭臨川人洪武初父以戶無田移種鳳陽時德昭

方六歲俾所親育之年十四詣鳳陽求父母不得遂絕酒肉間關十年得見父於漢中屯所而母已歿乃

扶父歸比卒廬墓歿於墓旁

林志

甘瑾字彥初臨川人仕終嚴州同知明初臨川詩派彥初與揭孟同張可立甘克敬皆善學唐人者也文翰類選載其詩四十首郭青螺豫章詩話乃不知其名或云餘干人

明詩綜小序

周彥宗號月窗金谿人洪武初以人材舉歷陞陝州知

州多方誘誨隨材造就人文大振晉工部員外固辭

祀陝州名宦

人物志

劉璧金谿人蘭谿縣簿時海寇多假富民之名朝廷欲族誅之使者至璧固拒不肯署曰強梁無辜尚不可殺況數十家良民乎使者怒縛璧抵京面奏上命批其額詞愈厲上悟遣使廉得其實復其官未幾卒民

為立祠

林志

涂自強宜黃人貢入太學授編修命偕戶部李祖欽往

兩淮事畢報命稱旨賜名忠陞台州知府在任二年
上廩其治績特召入京台人祀之名宦

人物志

黃清字用澄宜黃人洪武中由歲薦上春官奏對稱旨
拜御史涼國公藍玉謀不軌株連萬五千人清上言
波及者衆願從罪疑欽恤之意上大怒趣誅之後三
日上忽省清疏赦諸黨坐者詔恤其家

同上

饒侶字仲恭臨川人以儒士薦授翰林院博士兼潭王
紀善王薨上憐其老命歸為宜黃縣教諭侶有才望

文章典雅嘗典河南四川文衡士服其公號率齋學士陶凱序其集

同上

孫伯堅臨川人洪武中歷武庫員外郎廷臣薦為四川參政持政寬平不事苛察吏民德之官至鴻臚少卿

林志

黃紹烈名克臨川人洪武進士知瑞安縣有逋租糧長逃匿山海所司坐以劫掠紹烈力白其事未幾自免歸撰禮經博約策場總龜自號石泉所著詩文曰歸

田類藁

府志

王英字時彥金谿人永樂進士選庶吉士讀書文淵閣
與王植掌機密文字修太祖實錄授修撰進侍講帝
北征英扈從問以方畧英曰天威親征彼必遠遁願
勿窮追榆木川之變仁宗在東宮命英與尚書蹇義
等定喪禮議政事宿內閣者七日仁宗即位進學士
再進右春坊大學士乞歸省宣宗立還朝是時海內
宴安天子雅意文章每與諸學士談論文藝賞花賦

詩禮接最優渥嘗謂英曰洪武中學士有宋濂吳沈
朱善劉三吾永樂初則解縉胡廣汝勉之母俾前人
獨專其美修太宗仁宗實錄成遷少詹事賜麒麟帶
正統元年命教習庶吉士開經筵為講官修宣宗實
錄為總裁實錄成進禮部左侍郎年七十再乞休不
許擢南京禮部尚書俾就閒逸居二年卒年七十五
賜祭葬謚文安後改謚文忠子裕累官至四川按察
使列卿錄

按王英所著有泉坡集

劉濬字士哲崇仁人永樂進士以庶常改知臨汾縣薦
陞浙江僉事温州衛指揮恃奉天功多不法濬詣闕
暴其罪語太峻落職居臨清十餘年結草為庵教授
生徒用薦起為吏部主事扈駕征漢藩卒於京著草

庵集

人物志

吳錫字用庶金谿人明初以薦授國學錄時醴泉出神
樂觀上孝感詩五十韻賜乘傳還鄉著有時雨集曾

監長編 林志

梁萼字紹輝臨川人永樂初郡舉應遺賢授都昌訓預
修太宗仁宗兩朝實錄書成賜鞍馬白金乞歸所著
有貞趣軒集子矩字式之由儒士教諭年八十餘所
著有寧靜軒集孫善字明善領鄉試力學有文行所
著有復齋藁 人物志

伍徵字紹庸臨川人永樂中任石泉訓導教人不倦生
徒履滿戶外署縣事愛民如子居官淡泊去任行李

蕭然子福成化中任陝西提學副使

陝西通志

饒安字用中崇仁人永樂進士由庶吉士出為陝西僉事三秦故艱于水安為開便河十餘里導水至城下民德之勢豪占軍田四千九百餘頃奪以還屯所著有中庵集

白志

袁旭字廷輔樂安人永樂進士初為江津令正統初以輔臣薦知寧國府郡故繁劇處之裕如次舍學宮一新宛溪二橋尤為百世利賴詔簡天下廉能官十人

旭居其一尋以涇人程御史誣語被逮斃獄父老冤之分省人物考

鄒良樂安人永樂進士任松溪知縣松有銀鑛為民患奏罷之陞衡州知府致仕所著有四書編言存養錄

同上

蕭儀字德容樂安人永樂進士任吏部主事建言謫戍廷臣疏救之還職又言罷營繕惜名器等事忤旨復下獄死有戰線遺藁人物志

許同書臨川人永樂進士授御史時靖難功臣以賜田
為民害首疏抑之權貴斂手出按兩廣疏稱粵中阻
山瀕海不當以勲戚典戎又劾採珠中使為所誣死
廣民冤之著有梧臺清響集

同上

吳昌衍臨川人永樂進士歷官御史都御史陳智以私
怨令昌衍劾山西按察使徐永達不聽後智以堂考
罷永達昌衍以事聞智被黜時論偉之朝議欲移邊
城昌衍奏以勞民傷財事遂寢歷四川參政致仕

分

省人物考

王汝績金谿人由舉人薦知絳州絳土狹民繁產薄稅重汝績相其地利教以養桑不數年民業饒給歲課則布帛毳裘諸物任民所齎特取租辦而已人甚便之同上

吳餘慶字彥積宜黃人永樂間以薦除中書舍人歷官右通政致仕在朝三十餘年忠謹無過應制賦詩每蒙褒錄工楷書凡有金石文字多奉敕書之林志

何自學金谿人宣德進士由刑部主事歷僉廣西山西
按察使丁內艱服闋陞陝西按察使繫囚衆多自學
審閱旬日囹圄一空屢任法司洞識大體時論稱之
人物志

聶大年字壽卿臨川人生而一目重瞳比長博學善詩
古文書得歐陽率更法宣德末薦授仁和訓導母卒
歸葬哀感行路里人列其母子賢行上之有司詔旌
其門服闋分教常州遷仁和教諭薦入翰林未幾得

疾卒始尚書王直以詩寄錢塘戴文進索畫自序昔
與文進交嘗戲作詩一聯至是十年始成之大年題
其後曰公愛文進之畫十年不忘使以是心待天下
寧復有遺賢哉直聞其言不怒亦不薦及大年卒為
志其墓

白志

按聶大年詳見王抑菴所撰志銘著有東軒冷齋
二集

黎公弁字之冕臨川人宣德庚戌由經明行修薦任教

諭累典文衡纂臨潁蒲圻二志所著有蕁川蠅鳴等
集邵二泉亟稱之弟公潁字之秀與兄同薦歷仁和
候官教諭少保于謙薦陞監察御史所著問齋日錄
數十卷

人物志

姜洪字啓洪樂安人宣德進士選庶吉士預修宣宗實
錄進修撰有松岡文集十一卷及策府詳述行世

志

黎近

一作黎久

字之大臨川人宣德間應文學材行科歷高

要知縣時徭賊據城近為榜文諭降之被誣奏逮繫
刑部獄中十年作大明饒歌鼓吹曲十二章太平頌
幸太學頌一章獻之英廟嘉嘆命釋之召見獻麒麟
白象二頌上欲處之禁林為忌者所沮所著未齋藁
奉心集近百卷兄公輔字之及善屬文有醉墨窩集

書巢言百餘卷

人物志

伍禮字天秩臨川人正統初由明經任蘇州訓導歷知
曹州有權倖據民田六千七百餘頃恃勢凌轢民流

散禮執奏之得復所侵地陞南陽知府未上卒所著

有南坡集

林志

謝輔樂安人正統進士累官浙江參政金華盜聚入其壘諭以禍福賊感泣解散輔為人與物無忤操履端方始終如一所著有守拙藁四子俱舉進士

白志

何俊字士高金谿人正統中任浦城縣丞處州盜發俊築城塹治器械賊不敢入既而奉檄出崇安賊乘隙來侵俊間道歸撲勦餘黨民賴保障

福建通志

應用翔宜黃人正統間偕同邑羅守志符大德黃彥澄
鄒思學鄒思齊鄒大珏鄒大謨八人出粟助賑救書

旌表 縣志

單宇字時泰臨川人正統進士除嵯縣知縣調諸暨遭
喪服除待銓京師適英宗北狩宇憤中官監軍諸將
不得專進止致喪師疏請盡罷之以重將權景帝不
納初王振佞佛修大興隆寺日役萬人靡帑數十萬
英宗為賜號第一叢林至是宇上書言前代人君尊

奉佛氏卒致禍亂近男女出家累百千萬不耕不織蠶食民間營構寺宇徧滿京邑所費不可勝紀請撤木石以建軍營銷銅鐵以鑄兵仗罷遣僧尼歸之民俗庶皇風清穆異教不行疏入為廷議所格復知候官白志

按單宇所著有菊坡叢話

楊貢字彥魁樂安人正統進士任御史按治蘇松歲大饑以便宜發兌軍米數十萬賑給民賴更生陞蘇州

知府郡有富民武斷鄉曲貢寘於法都御史崔恭庇

富民劾貢欺罔坐免官有雪艇集

人物志

伍福字天錫禮弟正統甲子鄉舉授咸寧諭用薦陞陝

西按察副使提督學政福風格高邁言動有法詩文

典雅家藏書數千卷手自校讐至老不倦嘗編咸寧

縣志陝西通志修纂有法所著南山居士集雲峯清

賞集藏於家

同上

王常字大經臨川人正統進士除御史巡歷居庸城永

安以衛諸陵修葺要害復巡南畿風裁茂著劉儼作
兩旬觀風記以紀其績

分省人物考

黎擴字大量臨川人正統初由賢良舉授貴池訓導陞
蘇州教授學士錢溥稱其文可造曾王門戶自號雅
齋所著學鳴藁子憲少馳文聲成化乙酉舉江西鄉

試第一卒

林志

黃矩字憲則金谿人以材德薦預纂英廟宣廟實錄及
大明一統志所著有林塘吟藁希古齋集崇正錄等

書孫株號應沙倡明青田之學著大學中庸解

同上

按分省人物考黃矩事蹟與林志異今從志

吳英字士傑臨川人通天文星數之學正統間被誣謫
戍京衛武定侯薦之授五官司晨嘗言戊辰歲北方
有兵變英廟在南內聞其言命卜得飛龍在天之占
復辟賜宅一區欲官以卿寺謝曰臣福薄不足勝此
仕至春官正子昊以天文累官太常少卿

人物志

羅明字元亮崇仁人景泰進士除御史巡視浙江鹽課

改廣西按察僉事時蠻獠寇賓州總戎畏縮逗留不
進明率所募民兵格戰俘馘甚衆生獲賊首韋諫誠
捷聞賜敕獎諭卒官副使

林志

黃會字吉劬臨川人景泰進士授行人司副持身謙謹
陞南京屯田司郎中時堂官缺命會署堂事寅寐敬
服陞遼東苑馬寺少卿

同上

謝綬字維章輔子景泰進士由郎署陞四川參議平崇
彭寇改廣西副使適荔浦猺獠叢起進勦平之請分

置永安州參政陝西築引流堤民受其利累陞副都御史巡撫湖廣歷陞南京禮部尚書因災異陳言二十八事俱剴切優詔從之卒贈太子太保

同上

廖簡字行儉崇仁人性端重嚴謹景泰鄉舉初授金華教授改廣東增城以師道自任為人恬退不事表暴羅一峯稱其身不擇衣居不擇地仕不擇官所為詩文根據義理自號介庵有介庵文集

人物志

徐瓊字時庸金谿人天順丁丑進士第二人官翰林編

修與修英廟實錄歷陞南京翰林院侍讀學士掌院
事弘治中仕至禮部尚書加太子少保累疏乞休給
駙歸里所著有東谷文集 同上

吳與弼字子傳世稱康齋先生父溥建文時為國子司
業與弼年十九見伊洛淵源圖慨然嚮慕遂罷舉子
業盡讀四子五經洛閩諸錄不下樓者數年中歲家
益貧四方來學者約已分少飲食教誨不倦天順元
年石亨欲引賢者為己重謀於大學士李賢屬草疏

薦之加束帛遣行人曹隆賜璽書齎禮幣徵與弼赴
闕比至授左春坊左諭德與弼疏辭召見文華殿顧
語曰聞處士義高特行徵聘奚辭職為對曰臣草茅
賤士本無高行陛下垂聽虛聲又不幸有狗馬疾今
年且六十八矣實不能官也帝曰宮僚優閒不必辭
賜文綺酒牢遣中使送館次又疏稱學術荒陋苟冒
昧徇祿必且曠官詔不許乃請以白衣假讀祕閣書
帝曰欲觀祕書且勉受職徐聽還山可也留京師二

月遂稱疾篤放還賜救慰勞賚銀幣復遣行人送還
初與弼應召時以敕書崇重直聘以伊傳之禮意當
大用而宮僚無事懼不得即行其志以塞人望故卒
不受成化五年卒年七十九與弼始至京賢推之上
座以賓師禮事之編修尹直至今坐於側直大愠出
即謗與弼歸家知府張瓚謁見不得募人代其弟投
牒訟與弼立遣吏攝之大加侮慢始遣還與弼諒非
弟意友愛如初編修張元禎不知其始末遺書誚讓

直復筆其事於瑣綴錄又言與弼跋亨族譜自稱門
士士大夫用此訾與弼後顧允成論之曰此好事者
為之也與弼門人後皆從祀而與弼竟不果所著日
錄悉自言生平所得其門人最著者曰胡居仁陳獻
章婁諒次曰胡九韶謝復鄭伉

白志

按崇仁門下士敬齋白沙及婁胡謝鄭六先生之
外尚有魏莊渠余訥齋夏東巖潘玉齋而甘泉東
所惺堂諸公受業於白沙之門者不在此數焉嗚

呼盛矣康齋乃被同鄉在朝者之謗訖不得與餘
干新會從祀廟庭殊屬闕典

原跋

黃梨洲曰先生所不滿於當時者大抵在訟第一
事及為石亨跋族譜稱門士而已張東白聞之有
上告素王正名討罪無得久竊虛名之語一時名
流盡譁恐未免為羽毛起見者予則謂先生之過
不在訟弟之時而在不能喻弟於道特其不能喻
弟於道而遂至於官且難以囚服見有司絕無

矯飾此則先生之過所謂揭日月而共見者也若
族譜之跋自署門下士亦或宜然後人以成敗論
人見亨他日以反誅便謂先生不當與作緣豈知
先生之不與作緣已在應聘辭官之日矣不此之
求而屑屑於稱謂語言文字間甚矣責人之無已
也

胡九韶字鳳儀崇仁人少從康齋學即不習舉子業以
道自期先生器之諸生從遊者恒令先見九韶及先

生歿門人多轉師之九韶為人卓然動修規矩其詩

文務典實不樂華藻有文集藏於家

學業

車泰字子謨金谿人與兄弼宗弟亨俱受業康齋而泰
最久篤信力行師友咸稱之康齋應聘歸遣泰詣
闕謝大臣楊守陳丘濬皆有論薦期於用世而泰竟
不仕泰之學尤邃於易春秋有敦復遺藁

人物志

饒烈字丕承臨川人世業春秋與姪嶽同受業康齋之
門潛心經學嘗揭聖賢法言於軒楹間以自警策康

齋題其讀書之處曰麟經軒為之記晚遷居父墓之側自號巢雲有巢雲藁二卷

同上

曾自明樂安人景泰鄉薦授河南蘭陽縣教諭以造就人才為己責貧乏者多周給教訓如子弟羅一峯嘗曰為師儒者皆得曾自明道何患不立人才何患不成哉

林志

李大章號定庵臨川人嗜古篤修不樂仕進與吳康齋胡敬齋齊名康齋赴聘大章作詩送之有去歲徵書

來白屋何時行李出青山之句蓋不欲其行也 人物

志

吳宣字師尼崇仁人景泰四年試南省歸築巴山書院肆力經籍已授左軍督府經歷劾長僚不法繫獄十年始得白改中府陞鎮遠知府道疾卒有野菴文集

同上

陳勉字自勉臨川人祖殷嘗音釋十八史畧著有湖海集勉登成化進士除工部主事出知泉州有捕海寇

功改知福州府終河東轉運使長子威次子嬰俱進士
威監察御史嬰刑部主事

林志

徐霖字用濟金谿人成化進士為給事中言事出為嘉興知府致政歸屢薦不起吟詠最富有別齋詩集子
行慶弘治進士官至御史

人物志

吳哲字克明臨川人成化進士知嘉定縣築堤四十里
以捍海潮定兩京歲額費立小樓塘以便民呼為吳
公市陞御史人不敢撓以私巡兩淮鹽課需餘鹽二

千餘萬引開各場運河九十八道再巡畿內權寵家
侵據民地若干悉復之

分省人物考

吳嵩臨川人成化進士累陞揚州知府築堤以捍水患
至今祀之與巡鹺使者相訐御史褫官而嵩亦落級
補福州運同

林志

姚隆號竹菴臨川人成化進士授行人時出使者多挾
貨幣交易隆止挈一隸同行餽遺一無所受歸即致
仕益肆力問學博聞強記其著述甚富

府志

謝緝字維熙樂安人成化進士授醴陵知縣有善政歷工部郎中知處州府政尚平易有古循良風年未六十乞休弟紳以孝行聞

分省人物考

董時望號雪峯樂安人幼孤事母孝成化進士授御史慷慨建白性剛介不苟合豪右憚之居官三十餘年比卒無以為殮所著有雪峯藁

府志

王約字資博臨川人成化進士知平陽縣毀淫祠六十餘所以建社學歲饑請發粟當路不可約曰民困甚

矣救民獲罪所不辭也卒發之擢御史出巡蘇松湖

廣風裁甚著

同上

吳昊字仁甫臨川人為五官保章正成化間為監正觀象臺舊制渾儀黃赤二道交於奎軫與今之四正戾其陽經南北軸不合兩極出入之度陰緯東西窺管又不與太陽出沒相當故雖設而不用所用簡儀則郭守敬遺制也而北極雲柱差短以測經星去極亦不能無爽昊言授時厯元起至元辛巳今已二百一

十年與歲行差三度餘矣儀象於觀天最急失今不改恐漸疎謬詔下禮部議如其說製木樣測驗久之乃鑄為新儀更二道環交於壁軫其經緯雲柱皆與天合正德初進太常寺正卿

貴文憲集

吳世忠字懋貞金谿人弘治進士授兵科給事中由吏科出為湖廣參議歷僉都御史巡撫延綏以疾乞歸所著有學庸通旨洪範考疑矜庵詩集

林志

洪鍾字序和崇仁人七歲隨父之京有以其所書進者

憲宗見其字畫端楷召見賜入翰林院讀書弘治庚戌登進士除中書舍人陞禮部員外郎卒年二十七

歲

同上

吳潛字顯之臨川人弘治進士歷陞雲南副使權璫姚體忠奉敕徵餉司府以屬禮謁之潛不屈遂拂衣歸

世稱兩川先生

人物志

李哲字希先臨川人弘治進士嚴毅端潔善造人才在南郡抗疏敢言今添設江西巡撫九江諸道兵備皆

所建白所著有南野集祀鄉賢孫中以恩選為王府
教授建崇儒書院復捐田以資講會學者崇祀之稱
為致吾先生

府志

王萱字時芳金谿人弘治進士選庶吉士改給事中時
盜起四川敕萱往視師甫涉蜀境聞賊帥詭降且要
求臨江市安插萱移書巡撫高崇熙曰未有羣蜂一
方而能貼然者崇熙不聽旬日賊果叛萱以聞崇熙
被逮又疏劾罷總制尚書洪鍾朝廷為改用彭澤及

澤屢捷欲罷遣邊兵營復以為不可故蜀寇更難殆

盡論功拜通政使有青崖奏議文集

林志

洪範字邦正金谿人弘治進士知嘉興縣事承知府楊繼宗之後廉靜寡欲民間語云洪令楊守承前啓後擢御史提督畿內學政陞河南提學副使

分省人物

考

按洪範所著有柏山文集

樂護字鳴殷臨川人弘治進士歷宣城山陰知縣擢給

事中前後糾劾疏十數上擢光祿寺少卿尋以知天文歷法兼掌欽天監事三年五星聚營室護上書言占書曰五星之聚是謂改易王者有德受慶無德受殃聚房而周祚以昌聚箕而齊桓用霸漢興聚井宋盛聚奎是四者皆當更革之時一福一禍昭然不忒惟天寶聚於尾箕唐德弗迪卒有安史之亂皇上中興五星適聚可不益修聖德以承此大慶乎疏入下錦衣獄大臣交救獲免降為宿州稍遷河南僉事以

陝西參政歸有木亭雜藁

人物志

吳華字德輝東鄉人弘治進士由崇明令擢御史兩疏
乞建儲廷杖巡按浙江出知襄陽府罷歸宸濠謀逆
招誘東鄉降寇城中驚擾華與巨室何清楊文憲畫
計斬賊首數人城遂全

分省人物考

江珏字玉成金谿人弘治進士知華州陞刑部員外已
卯武宗南巡首倡十三司連名疏諫上怒罰跪午門
三日廷杖革職世廟即位首詔褒之弟瑤以太學生

謁送疏劾大學士劉健李東陽專權自恣下鎮撫司
健等連名具疏請開言路以容直臣自陳休致以避
賢路詔釋之瑬名大著授寧德主簿不赴

人物志安

志改撰

按瑬安志另有傳前志未載今采附珏傳後

劉璚臨川人由鄉舉知綿州性廉介守城禦賊居民用

安聞母訃過哀而卒無以為殮人以廉孝稱之

四川

名宦志


廖輓崇仁人弘治舉人知保昌抑豪強表貞節政聲籍籍南海霍韜起為吏部侍郎所至長吏跪迎輓獨長揖不拜韜益重之未幾南海令缺太宰汪鉉以巨邑難其人韜曰無踰廖輓者遂遷知南海時邑中多顯者卿相待從閭里相望輓不少徇人多其介謂不負所舉云

粵東名宦志

黃本字喬嶽樂安人進士以御史巡按雲南疏劾守監鄭文奎不法事權寺汪直庇之誣本落職部署臺省

交章論救不報弘治初召還未及任卒

安志



江西通志卷八十一

欽定四庫全書

史部
江西通志卷八十二

詳校官監察御史臣范袁

檢討臣德生覆勘

總校官知縣臣楊懋珩

校對官編修臣沈清藻

謄錄監生臣羅翺遠

欽定四庫全書

江西通志卷八十二

人物

十七

撫州府

三

明

王冀字東石通政營第也正德進士授禮部主事上三
疏一言宋儒羅從彥李侗當從祀孔廟一言公伯寮
馬融賈逵王弼何休戴聖王肅杜預當罷從祀一言

忠烈如龍逢蘇武等二十人名臣如汲黯宋璟等二十人名儒如王通胡瑗等十四人祀典皆宜補入歷官浙江提學副使致政歸與同邑洪北山黃卓峯吳疎山共為翠雲講會學者宗之

人物志

饒瑄字文璧以字行臨川人正德癸酉鄉試少不羈好馳馬舞劍弱冠委已於學即不為舉業剝撥之習星厯算數山經地志九流百家之書無不通徹已乃覺其泛初善橫渠以禮為先之教中慕邵子靜生百原

之學最後獨深信象山而遵體之蓋文壁之學凡屢
變而卒歸於簡易云自號行齋學者稱為行齋先生
同上

陳九川字惟濬號明水臨川人母夢吞星而娠年十九
為李崆同所知正德進士請告三年授太常博士武
宗欲南巡九川與舒芬夏良勝萬潮連疏諫止午門
荷校五日杖五十除名世宗即位起原官進禮部員
外郎中以主客裁革妄費羣小恨之張桂與鉛山有

隙誣九川以貢玉魏宏使通事胡士紳訟之下詔獄
榜掠謫鎮海衛已遇恩詔復官致仕周流講學名山
如台宕羅浮九華匡廬無不至也一時講學諸公謂
明水辨駁甚嚴令人無躲避處卒年六十九祀學宮
明儒學案

按府志九川受業陽明問學至忘寢食陽明歿會
九川歸亟往經理其家著有明水先生集王遵巖
為之序

劉穎字時秀臨川人正德進士由開化令徵拜御史以
議大禮忤旨廷杖出按廣西時田州岑氏構亂請兵
督勦斬岑邦彥於工堯監穎功居多復按貴州以疾
辭歸尋卒所著有小遲集

人物志

葉竦字喬新臨川人正德進士授龍泉令縣多逋賦竦
以誠心開諭積欠盡完調慈谿禱雨立應嘗大火拜
之而減傳以為神艱歸補常山未暮月縣復大治竦
更三縣率前人以為難而竦輒著績陞刑部主事得

疾歸卒

府志

劉最字振廷崇仁人正德進士以治最徵拜禮科給事中時執政欲以定策功要封拜最抗論其叨天之功事得寢會中貴有以齋醮怙寵者勢張甚最劾其罔上靡財言甚激直逮繫詔獄謫戍

分省人物考

劉雋字振道最弟正德進士歷刑部郎中嘗疏爭世廟議禮事不報尋為遼陽分守參議謝歸尚雍睦敦實行古道自持有一斑集刺語等書人稱華嚴先生

人

物志

黃直字以方金谿人嘗遊太學諫武廟南巡癸未進士
復疏陳勤治保躬四事授漳州府推官以長揖忤直
指遂誣直受金活人赴訊日雷雨暴作事大白復疏
請豫建太子繫錦衣獄後上感悟釋之謫判沔州丁
艱服闋時編修楊公名以劾冢宰被逮朝臣無敢救
者直抗疏救之併劾邵元節等左道惑民上怒廷杖
戍雷州穆宗登極贈光祿少卿學者稱卓峯先生

同

上

章袞字汝明臨川人嘉靖進士選授御史督學南畿捐
介端嚴請屬不行士習一時蹶興務講求經濟實學
痛黜詞章之習以劾左道亂政譏刺時宰左遷相從
講學者益衆稍遷陝西副使督學政乞休不俟報而
行所著章子瑣言學庸口義及詩文若干卷

府志

黃紀字子陳臨川人嘉靖進士擢御史視居庸關首疏
內臣紀揚奸狀上雖置揚於法而紀亦罷稍遷河南

僉事紀儀觀甚偉遇事果決無所避以此見忌

同上

王紹元字希哲金谿人鄉舉授碭山令河決築堤三十里捍之招逋民給種復業又立均地等法擢御史疏請罷馬市巡按貴陽宣慰安萬全擅兵爭繼首疏按之轉湖廣副使流寇猖獗撫臣薦紹元監軍結間謀得其降黨黃洪達為鄉導焚賊營斬獲無算功上賜白金綵幣陞河南參政致政歸

同上

吳悌字思誠金谿人嘉靖進士除樂安知縣調繁宣城

徵授御史十六年應天府進試錄考官評語失書名
諸生答策多譏時政帝怒逮考官下法司停舉子會
試悌為舉子求寬坐下詔獄尋得釋出視兩淮鹽政
海溢沒通泰民廬悌先漕賑之而後奏聞尋引疾歸
還朝按河南伊王典橫驕憚悌遺書稱為友悌報
曰殿下天子親藩非悌所敢友悌天子憲臣非殿下
所得友王愈憚之夏言嚴嵩當國與悌鄉里嘗謁言
衆見言新服宮袍競前譽之悌却立不進言問故徐

曰俟談少間當以政請言為改容及嵩擅政悌惡之
引疾家居垂二十年嵩敗起故官一歲中累遷至南
京大理卿時吳嶽胡松毛愷並以耆俊為卿貳與悌
稱南都四君子隆慶元年就遷刑部侍郎明年卒悌
為王守仁學然清修果介反躬自得為多萬厯中贈
禮部尚書謚文莊鄉人建祠與陸九淵吳澄吳與弼
陳九川並祀曰五賢祠學者稱疎山先生

白志

按孫承澤四朝人物考悌謚文端俟考

易文臨川人試棘闈擬定第一有嫌其卷太奇者遂不
果以選貢業辟雍為高淳縣丞署縣篆公廨學宮先
後經營苟利於民髮膚無愛建堤捍民比於蘇堤在高淳
三年竟拂衣歸里生徒雲集所著書詩春秋大
義又秋潭集若干卷

分省人物考

董燧號蓉山嘉靖辛卯鄉舉任枝江縣時施州諸司爭
立連兵十數年諸帥莫能平燧奉檄入壘諭以朝廷
恩禮遂服撫按稱其以一騎當數萬雄師兩遷至刑

部郎中大新所泉書院聞王心齋倡道海濱亟往師之歸與羅文恭作崇正會所著有周易問答圖通問

答人物志

謝相字大卿金谿人由鄉舉授東安知縣初歲飢吏偽增丁口冒賑繼者遂按籍征賦民困甚相為請得減千三百戶奸人殺四人棄其屍獄三年不決相禱於神夜夢四人泣語屍所獄遂成子廷諒廷讚俱進士
白志

陳宗慶字崇吉金谿人嘉靖舉人知嵎縣治尚禮教弟
鏜同科舉人任鄭州鏜弟鉦以丙午舉人授榮昌令
皆以方正見稱鏜子一夔戊辰進士歷溫州知府有
惠政從姪所敏同登戊辰進士工部郎中節冗費多
善績先後著聲金谿言家法者必推陳氏

府志

徐良傳字子弼東鄉人嘉靖進士館閣諸公屈指人才
必以良傳為首以武進令卓異召拜吏科給事中會
迎仙宮成朝議稱賀良傳謂異端充塞不能匡救忍

從諛乎上疏語侵權貴幾罹不測罷歸築廬峴臺下
以古文法教授里中所著有愛吾廬搶榆等集

人物

志

陳炯字文晦臨川人嘉靖進士由行人擢御史風節甚
著督饒河東首建書院屏居十八年召還歷卿寺建
牙西蜀平都蠻草坡諸寇已起吏部侍郎晉左都御
史巨璫敗詔籍其家得朝士姓名於記牘中惟炯與
太宰嚴清不與立朝風采凝峻室無姬媵門無遊客

上數顧而嘆曰真重臣也子以德進士仕終副使府志

曾佩字德甫臨川人嘉靖進士擢御史巡視居庸關疏
九邊糧餉論馬市邊政諸疏皆中肯綮以建儲事抗
疏杖戍當州與湛甘泉何古林講明理學不以斥逐
介意穆宗登極赦還臺省薦章十數上竟不起有元
山文集子如海姪如春姪孫國禎應瑞應星俱進士
同上

黃鉦字克靜宜黃人嘉靖進士汝寧推官擢比部主事
忤權貴左遷歷山東濱州知州地瀉鹵民多流移鉦
平賦緩征給種發粟逋民復業者數千家著有應山
集法律管見元風問難

人物志

黃希憲金谿人嘉靖進士歷官知嘉興府以清白自矢
置天鑒簿登記贖鍰毫不自私又勤於課士躬親校
藝為諭俗文以諷戒小民水旱步禱屢有靈應

分省

人物考

按黃希憲所著有蘭臺奏章自警編效顰初藁入
楚入蜀藁若干卷

譚綸字子理宜黃人嘉靖進士除禮部主事遷職方郎
中台州知府綸沈毅知兵時東南倭患已四年叅將
戚繼光募鄉兵禦賊數有功綸亦練千人自衛倭犯
柵浦繼光以道阻失援綸自將擊之三戰三捷又連
破之章安葛埠南灣加右叅政會憂去以薦起復將
浙兵尋改官福建擢右僉都御史代游震得巡撫任

倭屯崎頭城都指揮歐陽深搏戰中伏死倭遂據平
海衛陷政和壽寧各扼海道為歸計綸環柵斷路賊
不得出移營渚林繼光至綸自將中軍總兵官劉顯
俞大猷將左右軍令繼光以中軍薄賊壘左右軍繼
之大破賊復一府二縣詔加右副都御史考舊制建
水砦五扼海口薦繼光為總兵官以鎮守之境內悉
定四十四年冬大足民作亂陷七城詔改綸四川至
已破滅雲南土酋鳳繼祖遁入會理綸會師討平之

進兵部右侍郎總督兩廣軍務兼巡撫廣西招降岑
崗賊江月照等綸練兵事朝廷倚以辦賊遇警輒調
居官無淹歲迨南寇略平而邊患方未已隆慶元年
給事中吳時來請召綸繼光練兵詔徵綸還部進左
侍郎總督薊遼保定軍務自兵事起邊臣牽制議論
不能有為綸疏切言之而巡撫劉應節果異議巡按
御史劉翺巡關御史孫代又劾綸自專帝悉以兵事
委綸而諭應節等無撓綸初至按行塞上遂與繼光

圖上方略築敵臺三千起居庸至山海控守要害以
功進兵部尚書其冬予告歸神宗即位起兵部尚書
五年卒官贈太子太保謚襄敏

白志

周宗武字文啓臨川人為宜都令會峒賊寇施州誘其
渠殲之治行為十五郡最賜璽書褒美擢廬州知府
清操愈厲人謂之真廬州云

府志

徐善慶字元禎金谿人嘉靖進士知汝州教民植稻至
今稱其田為徐公田擢職方郎與分宜不合棄官歸

養所著有武選集來清軒詩

同上

高應芳字惟實金谿人嘉靖進士巡按山東恩威並著
時青州有聚衆稱勤王兵者應芳探其奸密擒首惡
伏法餘黨解散晉太僕卿疏馬政八事詔著為令所
著有羊洞遺藁谷南集

同上

舒化字汝德臨川人嘉靖進士授衡州推官隆慶初遷
刑科都給事中帝任宦官旨多從中下化言法者天
下之公大小罪犯宜悉付法司不當則臣等論劾若

竟自敕行則喜怒未必當而法司與臣等俱虛設詔
是其言有校尉負屍出北安門兵馬指揮孫承芳見
之疑有奸繫獄鞠訊詞連內官李陽春陽春懼訴於
帝言尉所負非死者出外乃死承芳妄生事刑校尉
帝信之杖承芳六十斥為民化請以陽春所奏下法
司勘問不納時高拱當國路楷陽順以構殺沈鍊論
死拱欲為楷地謂順首禍順死楷可弗坐化取獄牘
示拱曰獄故無鍊名有之自楷始楷誠罪首出為陝

西參政再疏致仕歸萬厯中召拜刑部侍郎刑部缺
尚書手詔用化會續修會典因輯嘉靖三十四年以
後事例與刑名相關者三百八十二條奏之詔頒示
中外尋稱病乞歸卒贈太子少保謚莊僖

列卿錄

陳文燧字汝相臨川人嘉靖進士授御史首疏正諸臣
從祀條陳時宜十二疏皆中肯綮巡宣大糾代藩橫
肆疏互市誤國計大觸時忌移巡雲南督撫藉征僮
妄殺報功者甚衆復株連無辜文燧悉平反之設義

塚收葬幾四十萬滇獄囚四百人奉旨決處止決四人不稱旨外謫歷參政拂衣歸臺省交薦不赴

人物

志

鄒子先宜黃人令常山捕獲巨盜金珠萬計知為大賈所失悉以歸之士民為建却金亭歷陞高州知府不赴

府志

李伯廉金谿人嘉靖舉人知郴州歲歉且大旱枕藉死者無算伯廉齋居步禱忽大雨決日五鶴從空飛繞

士民歡呼播酋蠡動擢馬湖僉事以勞卒於官

同上

劉世享字覺悟臨川人嘉靖進士為涇縣令序立條教
山澤之利聽民自取置社倉教積貯輸征有等胥徒
凜若負霜邑故多虎害為文以禱虎負子去擢吏部
士民泣祖於采石即其地亭焉邑四鄉各有祠

分省

人物考

桂天祥字子興臨川人嘉靖進士授祁門知縣時江浙
界中山盜竊發漸逼徽祁故無城天祥刻日鼎築民

不勞而工究至今賴之擢御史出按山西世宗有廢
后之議舉朝無敢言者天祥具疏痛切不報出為順
德知府攷績天下第一卒於任時年四十五

同上

陳文煥號靜菴文燧弟嘉靖進士由紹興府推官拜侍
御首疏請雪兩京冤獄遂著為例出按陝西直聲大
振復出為嚴州知府乞歸杜門十餘年終浙江布政
司參議

同上

聶廷璧字子雍金谿人嘉靖進士由郎署出為潁州僉

事有鳳陽陵監夙養亡賴前後使者皆不敢問廷壁
密獲殲之璫忿甚日伺短長竟無可乘陞福建兵備
副使有平倭功請終養歸

府志

曾如春字景默嘉靖進士巡撫河南時鑛使四出獨中
州倚如春調劑得免騷動又潞藩數潛遊所在震驚
抗疏以聞詔責護衛諸臣民始晏然以工部侍郎總
督河道疏築有法至今賴之

同上

李東明號勿齋臨川人受學於羅近溪年未四十棄舉

子業為丹徒教諭遷柳州不赴教人務以躬行為主
規言矩行年八十餘監司郡縣造廬請益言不及私
婦人孺子皆稱為勿齋先生鄒元標諸公嘗引吳聘
君陳檢討例薦於朝移書止之講學崇儒書院門人
有欲傳其語錄者東明曰語錄原非先儒之意且其
字義半用佛經皆門人之誤也其持論矜慎如此所
著有孝悌格言勿齋集

人物志

徐汝陽臨川人隆慶進士為武進令巡撫海瑞薦為武

選主事條上兵事十二策得旨以僉事討賊廣東單車抵瀧水圖上方畧請罷客兵惟專用廣兵乘賊出掠提精銳五千人趨峒火焚藤橋賊聞官軍既入驚潰渠魁就俘因以瀧水為羅定州置東安西寧兩邑適外艱歸民遮道哭留歷官光祿寺卿

同上

帥機字惟審臨川人隆慶進士由禮部郎出守思南謫鄴丞時寧夏班師上平西夏頌詔錄史館皇太子出閣又獻出閣講學頌皆蒙嘉納機慧敏純固肆力討

誦嘗日夕忘寢食然吏事非其所長著南北二京賦

表上於朝有陽秋館集四十卷行世

府志

朱東光臨川人隆慶進士初授平陽知縣有土豪殺人
匿屍數十年不能斷東光甫下車即廉得真屍於郊
外民以為神擢戶科給事中廣東參政致仕歸修宗
譜建祠宇置義田有范文正遺風

同上

張應雷金谿人隆慶進士授湖州府推官會大旱祈求
僚屬視為故事應雷獨齋居露處為民步禱大雨隨

之以剛方坐謫再補楚令拂衣歸多著作工韻語并
善書畫作金谿文獻考行世人物志

王懋德字敬甫金谿人隆慶進士授翰林編修侍經筵
尋引假歸郡邑長欲望見顏色不可得以南少司成
召起舟次臨清疾卒貧無以殮賻贈交至其子奉遺
命謝卻之同上

周邦傑字英甫臨川人隆慶進士為給事中劾罷翁司
馬請汰承運等庫內官梁忠等七百人直聲大振時

黃道瞻曾乾亨鄒元標魏允貞等相繼以言事觸譴
皆上疏力救護貸又力雪建言部臣趙世卿之寃歷
陞通政疏乞終養巖居二十餘年母喪哀毀幾殆所
著有潛籟二泉遊燕缶塞音吳諧明發樓藁

府志

王民順字道服金谿人隆慶進士宰廣寧徭獷寇張奉
委募兵於浙約束嚴明馳數千里無敢譁者授御史
按蘇松請罷織造蠲逋賦終左布政使

同上

辜俊字子偉臨川人值東鄉盜起一夕猝至俊母老扶

掖登山力乏不前母子俱為所執賊欲殺母俊曰寧殺我賊遂殺俊後有賊魁至罵曰辜秀才善人也何為殺之乃殺殺俊者而全其母

安志

余隆九樂安人司訓勝次子性篤孝時閩廣流寇破縣執勝去隆九急奔賊營乞命賊欲併殺之忽狂風揚塵蔽日未幾雷雨大作賊曰此人能感天心未可加

害父子俱得釋

同上

祝永壽號望坪臨川人隆慶舉人知福寧州事精明寬

厚愛民禮士州城向皆甃石傾欹可踰永壽為請當
道易以甃遂成堅堞歲當大造賦籍悉出手裁洞燭
奸弊州民咸謂前有陸公今有祝公

福建通志

鄒統臨川人知蓬州時已中擾亂統外給軍餉內節民
財勞苦萬狀逮賊平調去郡人追思之

四川名宦志

陳洪濛字元卿臨川人進士由主事陞彰德知府時鄭
王好文學誤四箴規時事屬庶人佑善誣王上怒甚
遣大臣就訊洪濛白其狀衆咸為危之乃曰吾守三

尺耳奈何令上有蔽讒間戕骨肉名獄上止錮王終身累陞叅政分守冀南道擒偵奸細又捕白蓮教諸賊特賜帑金會伊王恣橫不道都御史疏其罪遣使驗問不服乃廣賂求援上更遣少司寇趙覆按趙疏洪濛名與俱上允之曰是嘗按鄭藩者耶聞命即往盡得王諸不法事辭具服國除洪濛兩平亭宗正事皆當旨以晉藩按洛尤異數云仕至副都御史巡撫貴州兼督湖北川東軍務致仕

山西通志

董裕號擴庵樂安人隆慶進士擢御史出按滇南奏免
固原等路虛耗及礦課各數萬莽囚竊發撫臣出禦
忽報賊奄至裕不動聲色料民分守募壯丁扼險設
伏賊遁去忤中貴左遷起為大理少卿以僉都御史
提督鄖陽陞南工部侍郎抗列勲裔怙寵不法狀晉
刑部尚書予告卒贈太子太保有仁孝會旨及奏草
行世

人物志

聶良杞字子實金谿人隆慶進士授衛輝令徵拜禮垣

有清祀典斥異端諸疏出典滇學置五華書院萃博
士弟子讀習其中士風丕變晉閩叅辭弗赴歸田二
十餘年手纂諸儒語錄弟良璧嘉靖進士子文麟萬
厯進士仕終叅政

府志

胡桂芳號瑞芝金谿人萬厯進士司李杭州藩司以舊
逋數萬委桂芳追理密條上請詔蠲之歷湖廣大叅
會有事于播奉檄偕督師李化龍治兵轉餉將軍劉
挺李寅爭首功不相下桂芳為條析功狀兩軍懽然

遂以成功黔撫缺神廟特旨老成持重莫如胡某遂以副都御史撫黔旋以工部侍郎督河道卒謚忠端人物志

詹事講字明甫樂安人萬厯進士為御史上封事數十定新建伯王公檢討陳公布衣胡公從祀議按浙醴已督學南北畿得人稱盛會星變力陳主德時政之失又疏列李見羅破緬功李得輕宥公論壯之

同上

鄒光弼臨川人知鍾祥縣中官監稅開礦其鋒甚烈光

弼獨抗之或諷使少婉光弼慨然曰龍飛王氣宜完
興都黎民當恤安敢以小吏顧望致吾民破死相屬
乎稅璫陳奉杜茂銜之疏叅逮治久之復起為都水
主事卒祀鄉賢著大學古本東蠡放言

同上

周孔教號懷魯臨川人萬厯進士為御史差長蘆巡鹽
按河南督直隸學政皆以風采著倭蹂朝鮮封貢議
起孔教上言古之良臣折衝樽俎之間見事萬里之
外今正使已竊逃矣隨行已被殺矣沈維敬已被縛

矣乃尚書石星執迷不悟奉楊方亨片紙為著龜而
按倭之不變封事之苟成何其愚乎今日倭情不封
固變封亦變惟有守朝鮮為上策朝鮮失則遼陽危
遼陽危則京師震矣後皆如其言晉同鄉巡撫應天總
理河道回籍卒

分省人物考

湯顯祖字若士臨川人少善屬文有時名張居正欲其
子及第羅海內名士以張之聞顯祖及沈懋學名命
諸子延致顯祖謝弗往懋學遂與居正子嗣修偕及

第顯祖至十一年始成進士授南京太常博士就遷
禮部主事十八年帝以星變嚴責言官欺蔽並停俸
一年顯祖上疏謂言官豈盡不肖蓋陛下威福之柄
潛為輔臣所竊故言官向背之情亦為默移但知自
結於執政所得爵祿直以為執政與之縱他日不保
身名而今日固已富貴矣陛下方責言官欺蔽而輔
臣欺蔽自如失今不治臣謂陛下可惜者四朝廷以
爵祿植善類今直為私門蔓桃李是爵祿可惜也羣

臣風靡固識庶恥是人才可惜也輔臣不越例子人
富貴不見為恩是成憲可惜也陛下御天下二十年
前十年之政張居正剛而多欲以羣私人囂然壞之
後十年之政申時行柔而多欲以羣私人靡然壞之
此聖政可惜也乞戒諭輔臣省愆悔過帝怒謫徐聞
典史稍遷遂昌知縣上計京師奪官家居二十年卒
白志

按湯顯祖所著有玉茗堂集

曾維倫字惇吾樂安人萬厯進士授黃州府推官時江陵入朝楚中大吏皆奔走迎謁維倫稱疾不往日從貫城訪劍江諸學與耿楚侗焦弱侯羅近溪鄒南阜郵筒絡繹往來參訂直方之操益堅量遷嘉興府同知未強仕休歸杜門講學至老不懈

人物志

周獻臣字竅六臨川人萬厯進士授太康令為郡署免歸年未四十也學博而思鶩務鉤竒出險以遠俗士耳目家置大甕數百鈔撰羣籍網羅古今異言竒事

書成名曰鴻乙通葉文忠向高在政府上其書入祕閣以修史薦有旨報聞所撰有嶂嶮山人語林鸞林外編英巨刺言人外脞史蕙函摭言數百卷

同上

吳道南字會甫崇仁人萬厯己丑廷對第二人授編修知經筵日講一日方進講光廟忽他屬目道南輟講俟改容乃終篇晉禮部侍郎請皇太子出講凡十上拒朝鮮大藥之請却吐魯番貢玉其務持大體如此艱歸禪除即家起為東閣大學士三疏辭不允抵京

召對慈寧首請撤稅璫下章奏補蒲臬釋繫囚上皆
嘉納之請告疏凡二十上會母喪乃得請作大政議
二十條則道南絕筆也贈少保謚文恪著有日講錄
已山草睹谷集及奏議語錄諸書

安志

吳仁度字繼疎萬厯進士授中書舍人三王並封議起
抗疏爭之久之擢吏部主事歷考功稽勲郎中趙邦
清被劾疑同官鄧光祚等嗾言路憤激力辯章下考
功仁度欲稍寬邦清罰給事中梁有年遂劾仁度黨

比時光祚引疾去而仁度代為文選御史康丕揚復
劾仁度傾光祚而代之自邦清被論後言路訐不已
都御史溫純恚甚請定國是以剖衆疑而深為仁度
惜尋補南京刑部郎擢太僕少卿以僉都御史巡撫
山西砥廉隅與魏允貞齊名居四年以疾歸熹宗初
起大理卿進兵部右侍郎復稱疾去再起工部左侍
郎天啓五年魏忠賢以仁度與趙南星楊漣等善勒
令致仕尋卒

白志

按吳仁度疎山先生之子故字繼疎人物志所載
不詳白志考定

周曰庠字時化臨川人萬厯進士在諫垣首疏釋繫起
廢先後擊諸巨璫正人代藩冒嫡之議督視城工節
金錢無算奉差便道歸省旋丁繼母艱哀如生母服
除陞大理少卿卒有三垣奏議行世文集雜藁藏於
家人物志

謝廷讚字曰可金谿人萬厯進士未授官即極論礦稅

之害旋授刑部主事有詔於二十八年春舉行冊立
冠婚之禮將屆期廷讚上疏據易理以陳時事曰觀
乾坤以明閤負之當補臺省之當選即損益以明礦
稅之當撤即家人以明冠婚冊立之當速即中孚以
明詔令之當信末言皇上誠採納臣言即罪臣出位
斥逐臣禁錮臣臣擊壤丘壑有餘榮矣持疏跪伏文
華門候命帝震怒褫職為民是歲冊立之禮不行廷
讚歸僑寓維揚授徒自給久之卒天啓中贈尚寶卿

白志

按謝廷讚所著有玉馬軒步丘草綠屋游霞繼亭

等集

謝廷諒字友可萬厯進士南京刑部主事帝命李廷機入閣又召王錫爵廷諒言廷機才弱而閣錫爵氣高而揚均不宜用又曰儲君之立為王也自錫爵始舉人之有考察也自廷機始巡按之久任也自趙世卿始章疏之留中也自申時行始年例之不舉考察之

不下也自沈一貫始此皆亂人國者也疏入留中終

順慶知府

同上

按謝廷諒廷讚之兄所著有清輝館帶櫺編起東
草逢掖集

章正岳字益孟臨川人萬厯進士為杞縣令治河救荒
聲望大起以卓異徵為吏部郎弟光岳字見前由進
士中書改吏部出為山東參政歷太常通政至刑部

左侍郎

府志

何宗彥字君美其父由金谿客隨州遂家焉萬厯進士累官禮部侍郎署部事六年遇事侃侃敷奏時望甚隆旋乞假去光宗即位即家拜禮部尚書兼東閣大學士天啓元年加太子太師建極殿大學士四年卒於官謚文毅

白志

詹爾達號起鵬樂安人萬厯進士歷兵曹備兵湖南勦武陵藍山之寇平四川藺囚值鄒滕白蓮妖賊起改大名道擢光祿寺卿以糾劾魏璫間住崇禎初以兵

部侍郎起用辭終養不赴

人物志

易應昌字瑞芝臨川人萬厯進士授甌寧令擢御史巡
漕督江北學政晉大理少卿忤璫削奪璫敗以副院
起佐臺時京師有囚獄之變帝震怒司寇中丞皆以
忤旨下法司少司寇及廷尉皆不敢出一語獨應昌
奮筆請從寬擬上不可應昌曰法如是止矣臣不敢
以一官易一命也三復執奏如初上愈怒遂并寘應
昌於辟閣部皆力救不聽會天日晝晦雷震殿庭上

悔悟趣詔停刑卒未春旱保章氏奏言大臣有寬上
始出應昌等論戍後數載敘復

同上

李學旻字本仁臨川人從諸父致吾勿齋窮濂洛之學
萬厯己酉鄉舉為國子監學正祭酒唐大章朔望必
請陞講座率諸生聽講南雍稱為盛事擢守泰州革
鹽稅築堤壩以杜水患親擒巨窩州民德之左遷漢
川令時寇蹂荊襄距縣僅再宿無城可守為立礮墩
設柵架守禦有方賊不敢犯乃建議築城遂為巖邑

病亟告歸吳楚皆祀名宦

府志

朱欽相字如容臨川人萬厯進士由平湖令徵拜吏科給事熹廟初封保媼客氏為奉聖夫人欽相首疏極諫媼佯求出以激上怒謫歸以薦起原官時八閩苦海寇晉福建巡撫馳檄海上召渠帥面諭利害帥感泣歸命忌者誣構逮問上察其廉介有素釋之

人物志

吳之甲字元秉臨川人萬厯進士督浙江學政淹雅好

奇以唐宋制科法拔俊英士雜詩賦詔詰試之文風
自是一變卒於官丰裁峻厲以經世大業自命不竟
其用人惜之有靜排集三十卷弟之仁癸丑進士為
御史有聲終湖廣布政

同上

丘兆麟字毛伯臨川人萬厯進士由行人擢御史崇禎
初即家起為河南巡撫始兆麟巡方時建天中書院
以崇德勸學去中州大猾數十人諸政畢飭尤盡心
獄事所閱審錄冊二千一百八十有奇所列矜疑開

釋者至二百二十有奇至是兩河習其前政上下宜之加兵部侍郎卒於任其所著述有水暄亭玉書庭集六十餘卷又按豫仁言四卷皆行於世

同上

魏光國字合虛東鄉人父廷用知龍門縣創橋為渡至今稱魏公橋光國萬厯進士授行人風節自許應詔言事語侵當軸廷推擬晉銓司忌者格之不報乞養歸著有文竿魚古堂集

同上

張瑀號慎軒臨川人萬厯舉人吉水教諭與鄒南臯以

德業相砥礪南臯推為畏友得士如周端豹劉同升
郭之祥王宏劉渤皆先後成大名歷官刑部郎中出
守肇慶徭獠叛奉檄督勦三閱月悉平瑀功為第一
陞甘肅兵備副使致仕卒

府志

陳鍾盛字稚德文燧孫萬厯進士番禺知縣聞祖訃非
嫡孫不應承重堅請守制歸服闋改教授陞助教疏
劾魏璫建生祠太學前且侵御道非法璫敗擢禮部
主事教習駙馬公主已降府駙馬尚於門外日行叩

頭禮三年始就婚鍾盛抗疏言非會典儀注化源所
係亟宜釐正有旨如盛奏復言掌府內臣諸要挾狀
拂璫意降調旋補南兵部主事擢禮部郎中歷知登
州皮島兵變謀從登入海鍾盛預為守禦備登保無
恙陞曹濮道卒

同上

曾棟字隆吉臨川人萬厯進士由祠部郎陞四川驛傳
道時上官董卜與高箕稱兵相攻撫臣請於朝以兵
事屬棟董卜嘗入貢朝議疑其鴛鴦將羈留之棟持

議不可引卜詣關上疏得釋歸至是卜諭其衆曰是
向嘗生我者拒之不祥遂與高箕盟而還亂遂定以
功屢晉布政使子亨應崇禎進士自有傳

人物志

李大覺字覺之金谿人萬厯鄉舉授穀城知縣穀為楚
蜀咽喉之會數被寇井里蕭然大覺招集流移守具
稍定以事謁撫軍聞賊逼城亟馳歸率民兵死守援
絕城陷繫印於肘縊死堂上楚撫王楊基檄行襄郡

建忠烈祠

同上

湯開遠字伯用顯祖次子崇禎五年由舉人為河南推官帝惡廷臣玩愒持法過嚴開遠疏諫其略曰陛下臨御以來明罰敕法小臣大臣禁獄者相繼見廷臣薦舉不當疑為黨徇惡廷臣執奏不移疑為藐抗以策勵望諸臣戴罪者衆而不諒其致誤之由望推諸臣以責諸臣引罪者衆而不諒其致誤之由望推諸臣以心待諸臣以禮諭中外法司以平允至錦衣禁獄非賊寇奸宄不宜輕入帝怒摘其疏中語責令指實乃

上奏曰時事孔棘諸臣補救良難有過可議亦有勞可準有罪可程亦有情可原今綜核太過懲創太深往往朝所為縲奪擯棄不少愛之人而野以為推重愾嘆不可少之人上與下異心朝與野異議欲天下治平不可得也蘇州僉事左應選任黎昌縣令率土著保孤城乃用小過卒以贓議事急則鉅萬可捐事平則錨鉅必較向使昌黎不守同於遵永不知費朝廷幾許金錢安所得涓滴而問之給事中馬思理御

史高倬值草場火發狂奔盡氣無救燎原此不過為
法受過耳更欲以他罪論則甚矣宣大巡按胡良機
陛下知其諳練兩任巖疆尋因過誤褫革輿論惜之
監兪主事吳澧宵旦河干經營漕事運弁稽違量行
責戒乃褫革之夫兵譁則為兵易將將譁則為武抑
文勇於譁而怯於鬪安用此驕兵驕將為未復為都
御史陳于廷易應昌申辨帝怒切責之河南流賊大
熾開遠監左良玉軍躬擐甲胄屢致克捷帝以天下

用兵意頗重武督撫失事多逮繫而大將率姑息開
遠以為偏復上疏言文臣未必無才能乃有寧甘罷
黜必不肯任不敢任者以任亦罪不任亦罪不任之
罪猶輕而任之罪更重也行間失事無日不議處議
罪而於蕩寇安民毫無少補則今日所少者豈非大
公之賞罰哉帝得奏大怒命削籍解京訊治左良玉
偕將士七十餘人合奏乞留巡按金光辰亦備列其
功狀以告帝命釋遂戴罪辦賊十年正月討平舞楊

大盜楊四論功擢按察僉事監安廬三郡軍是時賊
大擾江北開遠數有功巡撫史可法薦其治行卓異
進秩副使監軍如故十三年與總兵官黃得功等大
破革裏眼諸賊賊遂乞降朝議將用為河南巡撫竟
以勞瘁卒官軍兵咸為泣下贈太僕少卿

白志

黃樺金谿人進士通判寧波渡海親覈昌國軍儲盡除

宿弊復籍海舟什伍相保各有標驗奸萌肅清

浙江

通志

鄒毓祚臨川人天啓進士令武陵逆璫構邑紳唐紹堯
坐贓六千金毓祚為捐俸勸施不足後考滿藩司以
此斬之毓祚抗聲曰朝廷額供不及果當禡此乃勢
璫私憾耳徵入西臺疏起竄逐諸臣又疏列閹黨孫
雲鶴等罪狀語太迫切落職稍起至職方司郎中府
志

祝徽字文柔臨川人天啓壬戌會魁巡按山西單騎行
邊周覽扼塞邏者執樵採人冒賞按實釋之邊人德

馬平臺召對條奏起廢進賢緩刑勤政等疏內艱歸
時徽年已高猶哀毀不自勝尋構疾卒所著有言餘
集及邊防京儲鹽策等書

人物志

艾南英字千子東鄉人萬厯末場屋文腐爛南英深疾
之與同郡章世純羅萬藻陳際泰以興起斯文為任
乃刻四人所作行之世世人翕然歸之稱為章羅陳
艾天啓四年南英始舉於鄉座主檢討丁乾學給事
中郝土膏發策詆魏忠賢南英對策亦有譏刺語忠

賢怒削主考籍南英亦停三科崇禎初年始詔許會
試久之卒不第而文日有名負氣凌物素所交亦多
憚其口始王李之學大行天下談古文者悉宗之後
鍾譚出而一變至是

關

負重名於詞林痛相糾

駁南英和之於下排詆王李不遺餘力南京繼覆江
西郡縣盡失南英乃入閩留居一載以疾卒於延平
白志

按南英究心史學為古今全史千餘卷編集甫竣

遽罹兵火與他著述俱散佚無存今惟時藝行於世

章世純字大力臨川人天啓辛酉舉人著有已未留書及章子留書凡天文律厯以至五行禽遁陰陽星卜之言一見即能剖其元微摘其疵謬授翰林孔目有旨召對以語音期吃辭條上兵事極言禁旅邊鎮及召募客兵之弊出為柳州知府時年已七十矣聞京師變悲憤發疾卒于柳州

人物志

傅朝佑字右君臨川人舉鄉試第一師事鄒元標天啓二年進士授中書舍人考選補兵科明年八月疏劾首輔周延儒陰擅威福明毒忠良忤旨切責遷工科左給事中疏陳當務十二事一納諫二恤民三擇相四勿以內批用輔臣五勿使中官司彈劾六勿令法外加濫刑七止緹騎八停內操九抑武臣驕玩十廣起廢十一敕有司修城積粟十二講聖諭六條旋出封益藩進刑科都給事中還朝愆期為給事中陳啓

新所劾貶秩調外未行疏論溫體仁六大罪帝怒除
其名下吏按治踰月體仁亦罷中官杜勲重朝佑令
其上疏請罪而已從中主之可復故職朝佑不應十
一年冬國事益棘獲罪者滿圉朝佑乃從獄中上
疏為請寬恤語過激廷杖六十創重卒福王時復故
官白志

按傳朝佑所著有英巨集

謝德溥號培元東鄉人天啓進士選庶吉士授檢討以

省親歸杜門不出崇禎初召入晉侍讀纂修兩朝實錄知制誥平臺記註編纂六曹章奏上御經筵德溥矩度端嚴進止不失尺寸上目注之將特用矣時黨論繁興德溥力求南為國子祭酒假歸三晉宮階四預枚卜明旨敷趣以母老具疏力辭通籍三十餘年前後立朝不過五載恬於仕進知幾之哲有過人者母卒結廬深山改號雲菴有雲菴等集

人物志

車夢瑤字玉符金谿人天啓進士歷任陝西副使駐涼

州涼為河西極邊以軍功陞湖廣按察使治兵辰州
會推河南巡撫命未下卒崇禎十三年察檄甘肅功
特贈三級賜銀綺卹其家

府志

劉先春字伯陽天啓進士由庶吉士改刑科給事中時
魏璫擅權在廷水火先春上疏謂諸臣不當以口舌
事君而人君不當更以耳目任人廷劾逆璫謂祖宗
無法天子無威幾蹈不測璫敗晉太常卿

同上

陳際泰字大士臨川人家貧不能從師又無書時取旁

舍兒書屏人竊誦從外兄所獲書四角已漫滅且無
句讀自以意識別之遂通其義十歲於外家藥籠中
見詩經取而疾走父見之怒督往田則攜至田所踞
高阜而哦遂畢身不忘與艾南英輩以文名天下其
為文敏甚一日可二三十首先後所作至萬首經生
舉業之富無若際泰者崇禎三年舉於鄉又四年成
進士年六十有八矣除行人居四年護故相蔡國用
喪南行卒於道

白志

按陳際泰學業詳見羅文止所撰大士傳中所著
四書五經制藝不下四五千篇此外有四書讀五
經讀等書行于時子孝威孝逸並知名器其家聲
焉

龔廷獻號鑑惺金谿人天啓進士授行人選御史璫敗
廷臣多毛舉細過互相彈擊廷獻疏言借題報復徒
損國體亦壞心術宜一切禁止出按時理枉辯冤尤
以矜恤為事人稱長者自免歸

府志

孔大德字登小天啓丁卯鄉試第一南宮罷歸杜門著述
餅無儲衆意興豁如著史評十五卷易解八卷房
野堂集聚園詩草十餘卷

人物志

羅萬藻字文止臨川人天啓丁卯舉人與大士子大力
主文章之柄者四十餘年海內稱為四先生嘗憤
邊事潰散著本守議數千言大畧言今天下文武乖
方內事殊適磨牙厲吻惟苞苴門戶之死守不移一
體之中痛癢既不自知搔抑亦無其具惟有坐以共

斃而已崇禎己卯倪元璐以賢良方正薦有旨特用
不赴授上杭令唐王時擢禮部主事艾南英卒哭而
殯之數月亦卒所著有小千園集同上

王廷垣字潛服東鄉人天啓進士由庶吉士授編修直
起居注編纂章奏常奉使頒詔冊封所至必問軍民
疾苦山川扼塞還列疏入告上嘉納之歷陞庶子掌
春坊事會上欲布素郊祀疏言事天以實不以文且
乖禮制語殊切直改祭酒晉禮部侍郎所著內外制

及奏議有留園集

同上

鄧士楷字行之臨川人天啓進士由中書改兵科給事
疏言行間將帥數行更調兵將不習以後不必會推
許經畧於本鎮慎擇酌量才品咨部題補庶相信既
深所舉不負上嘉納之時國計日絀有言暫免各省
直官入覲止令捐輸助餉者士楷抗議爭之謂見小
利而忘大體何以風厲天下議遂寢自疏乞外補浙

江按察副使

同上

王肇對字銘新東鄉人天啓進士崇禎初拜御史所奏
議皆關國家大計嘗曰居官必先分別公私人才消
長之關亦在吾輩力持之耳巡按江南遘疾卒

府志

陳其赤字石父崇仁人崇禎進士司理衢州歷西安守
撫綏有方時秦中寇氛方熾獨西安得免以副使備
兵川中獻賊圍攻嬰城固守成都陷不屈死之同殉
者四十餘口惟長子存於家

人物志

唐爾選字思吉樂安人崇禎進士擢御史閣臣錢士升

以票擬忤旨引咎回籍爾選具疏申救且言悖祖訓
十二事上大怒召府部科道同入武英殿面詰上聲
色甚厲爾選從容對曰臣所言祖訓尚不止此因述
列朝聖政四十餘條上屢改容起立左右閣臣皆戰
慄爾選侃侃不少遜撓上怒甚指疏中權宜苟且四
字罪以指斥無奏對體命官校拿下爾選大聲曰臣
死不足惜皇上幸聽臣言事尚可為即不聽臣亦可
留為他日之思閣臣以下極力申救得免死罷歸甲

申以原官起用不赴

同上

傅雲龍字蒸甫金谿人崇禎進士授中書京師戒嚴士卒僵臥雨雪中雲龍上疏請更番城守又上勦敵圖幾疏皆得旨累遷副使備兵台紹計擒海寇竺武貝學杜等東陽許都陰受逆闖偽劄首倡亂於金華雲龍簡勁卒倍道進以除夕抵城下襲敗之轉漳南道

叅政

府志

張斌字憲卿本姓姚臨川人金谿籍戊午鄉試第一乙

士進士授大理評事擢禮部勲戚有聞河取利者立
清之皆斂戢不敢爭遷廣西蒼梧道卒官歸櫬日士
民扶服數百里不絕第爛以庚辰特用賜同進士出
身同上

黃配元字位兩樂安人崇禎進士令懷寧流寇焚掠江
北城守戒嚴皖城舊有余忠宣濠塹歲久湮沒配元
銳意修復又於濠外築牛馬牆繞以木柵以禦賊騎
之衝突具蘭石以挫敵鋒六年之間逆賊震鄰卒不

敢逼行取授南兵科給事中特旨以都御史巡撫安慶厲兵馬飭守禦上游屹然方聯絡楚豫以圖大舉丁內艱去而江上不支矣前有文肅後有中丞皖人至今稱兩黃公祀名宦

人物志

傅占衡字平叔臨川人少有異稟涉獵諸家經目不忘性淡泊恥事徵逐奉父山中謝絕一切所著漢書撫言編年國策頗得史家之要嘗依郡志作臨川記三十卷有湘帆堂集三十六卷

白志

陳晝字惟易金谿人讀書躬行其學尤邃於易謂程子
言易象變占備乎辭由辭以得意為知易之大義而
邵朱或有異同也蔡虛齋至謂文王周公狹於邵子
朱子密於孔子語尤不倫作周易意十二卷循孔子
之傳以測文周之辭從文周之辭以測伏羲之卦庶
幾得之又著雜言百五十章別有易備易謀筮考諸
書數十卷

同上

徐奮鵬字自溟臨川人講學授徒四方裏糧問業屢填

戶外嘗刪補毛詩朱傳著有古今治統二十卷辨俗
十卷怡恩集十卷學者稱為筆峒先生姪春溶有文
名進士 同上

李茹春字載陽臨川人崇禎進士知華亭縣賦重民疲
布折白糧僉解者輒破家茹春派運有法盡革陋規
歲大歉飢民聚衆刦巨室太守率兵往捕譁益甚茹
春單騎諭解民賴以安立祠水次祀之

王士和字萬玉金谿人崇禎庚午鄉舉南京既覆避地

入闕授吏部司務擢兵部主事閱一月甫擢至延平府唐王走汀州留士和居守警報疊至召父老謂曰吾雖一月郡守當與城存亡若等可速出毋使數萬生靈盡膏斧鑕衆泣士和亦泣退入內署謂其子宗翰曰吾一介書生數月而忝二千石安敢偷生從容正衣冠投繯死時軍帥憐宗翰欲授以官宗翰不受扶父櫬歸

人物志

揭重熙字祝萬臨川人崇禎丙子丁丑鄉會試皆以五

經中式初授福寧知州福王時擢吏部主事外艱歸
用曾櫻薦以考功員外兼兵科給事中從傳冠辦湖
東兵事瀘溪告警冠不能救重熙劾解冠任兵事遂
皆委重熙復擢江西巡撫右僉都御史攻撫州不克
而退永明王授重熙兵部尚書兼右副都御史總督
江西兵召募萬餘人薄邵武敗還率數十人赴百丈
礮就空營炊食被執至建寧死

白志

黎民安金谿人崇禎十四年獻賊破襄陽時民安為遊

擊率所部力戰矢盡被執罵賊不絕口而死

同上

傅鼎銓字惟源臨川人年甫冠舉於鄉為文深靜如其人崇禎庚辰進士癸未特授翰林檢討闖賊犯闕銓投所居井中家人挽出之後間道入閩被獲不屈死之撫州新志

鄭夢眉金谿人崇禎十三年以舉人授四川南郡令殫心撫字民彛帖服張獻忠方肆屠掠又聞京師陷懷宗殉社稷北向長跪再拜畢正衣冠投繯而絕合室

死難十餘人部民聚哭為立祠祀焉

同上

李國正字仲將臨川人由舉人知耒陽縣革解費陋規銀二千餘兩峒賊為寇捐金募民兵三千人堅壁待之賊從間道遁去乃縱兵斬數百人生擒其渠自是賊不敢窺境丁艱歸復補順昌卒於官

同上

曾益字洪西臨川人以貢廷試特授兵部擢貴州安平道時獻賊入黔諸司皆遁獨益集兵拒守城破死之弟拭以薦舉為蒲圻令亦死獻賊之難

白志

曾亨應字子嘉臨川人崇禎進士歷官吏部文選主事
十五年秋詔起廢亨應以毛士龍李右謹喬可聘等
十人上御史張懋爵劾其私遂謫去南京覆江西俱
陷永寧王慈炎招連子峒土兵數萬復建昌入撫州
寓書亨應亨應募兵數百未及會而撫州失亨應并
長子筠被執俱死宗族死者二十人部卒死者三百
餘人弟和應奉父棟避肇慶聞兄死曰烈哉兄為忠
臣兄子為孝子復何憾肇慶又失乃拜辭其父投井

死先是揀弟棧為蒲圻知縣棧兄益為貴州僉事俱
死難人稱曾氏五節云始亨應為懋爵所訐人頗疑
之後亨應死難而懋爵竟降闖賊為直指使

同上

王政岐字體仁臨川人幼孤母楊苦節勤課領鄉薦授
鄱陽諭陞陽朔知縣俗好屠牛歲輸官八百金曰牛
胖稅岐禁私宰弗取其稅調臨桂縣里長例為鹽商
挽舟灘浚水駛舟損責賠累死力請於上獲免通邑
繪像祀之

廣西通志

桂春陽臨川人善化尉時下鄉催徵自備糈飧貧民任將雞豚什物代估以完秋毫無犯民甚德之 湖廣名

宦志

曾拭字季子臨川人崇禎間由辟舉授蒲圻令時寇氛交訌軍需旁午以息事寧人為務刻意城埤訓練鄉勇得勁卒三千人獻賊自陷省城後所至破竹咸寧嘉魚已設偽職拭獨傳檄討賊揚兵砂磧摧其前鋒月餘不敢逼城後單騎擊賊墜馬暴卒王墩廟鄉民

吳珊瘞之廟側為草薤以泯其迹其子來蒲發塚秘

斂面色如生

同上

周官字百度臨川諸生崇禎間在粵西以兵部郎檄諸路召募城陷死之

廣西通志

陳煖字景川樂安人三歲失母繼母虐之飢寒楚撻無所不極人以語其父父欲逐母煖時年十五號慟乞留父歿偕其妻承歡繼母無異所生母為之感泣

安

志

徐模字子範臨川人少以孝著事繼母極承順撫兄子無異視子天衢由大行晉銓司丙寅忤逆璫閒住模大笑曰使汝失身則辱莫大焉

同上

董弘學樂安人年十二母卒哭踴瀕死大父懼以慟天縻之塾執書垂淚不瞬謂其師曰師無以兒書為也吾僅欲得長侍吾母師亦感泣母柩故停館側一夕三鼓大雷雨忽聞嗚咽風雨聲相錯師心動曰得無某孺子猶號母所亟視之從電光中見其兩手翼柩

如晤語然柩中似有應者亟護歸繼母凡六弘學事
之皆如生母最後母楊嘗病疫人無敢近獨弘學日
夕與俱壬申流寇肆掠弘學倉卒負母去賊見其四
壁所列皆聖賢格言家獨免於燬

同上

按安志孝義傳同邑尚有陳發張正綱詹德器張
興純曾希和曾筠金谿黎人瑞江華全大成臨川
張大冠李伯美黃作龔以誠吳二崇仁聶權黃二
嚴東鄉吳安邦吳大行姓名附錄於此

周文煒字赤之本金谿人生於大梁生平孤行己意屹
立不移曰吾固坦然者也因自號坦然入南雍就選
得暨陽簿謝官歸築室秦淮曰壯為五洩遊人老作
秦淮釣叟於願足矣子亮工號櫟園庚辰進士數歷
中外二十年能文章尤愛士故人士咸嚮往之

江南

流寓志

鄒孚孝字恭甫臨川人天啓丁卯鄉薦性豪邁家徒壁
立飲酒賦詩自若也因公車授蘄水教諭左良玉叛

孝亟請民兵登陴縣令孔某望風迎降孝正衣冠坐
明倫堂賊至挾之出罵曰生平所守惟文章節義豈
從反賊耶遂遇害

府志

國朝

晁道焜字懷劬祖公詩建九經堂於金谿即今學宮也
道焜少孤事母盡孝分產自取硤瘠曰吾年長尚習
經營惟諸弟可憫耳順治丁亥大飢百計賑施周人
緩急雖老不懈年八十餘卒子星辛卯舉人有素心

堂北山悟言集

安志

按安志同邑傳振鉉樂安丁自昌俱有孝義傳

江琳字嘉玉金谿庠生順治五年金聲桓叛瀘寇乘機
搆亂假冒援師所至焚掠琳母朱被執琳傾貲求活
母繼以簪珥力竭未厭遂殺琳琳女七歲見父死以
石擊賊中額賊怒復殺女朱強起奪刃不勝併殺之
同上

楊孕第字及君樂安人順治辛卯拔貢歷官鳳翔知府

甲寅吳逆叛鳳翔為川咽喉進剿兵糧餉轉輸賴以
不匱陞神木道副使以母老告終養歸卒于家

同上

張朝國金谿人順治四年知松溪縣時兵燹後民多散
處井邑一空朝國招集流亡結以恩信咸歸復業嘗
自署其廳事云以名教為樂地登赤子於春臺後鄧
西兵起遇害邑人皆為垂涕

福建名宦志

李來泰字石臺臨川人順治壬辰進士授工部虞衡司
主事出督江南學政已而巡視漕河復整飭蘇常水

利農務裁缺歸里康熙戊午以博學宏詞徵明年授翰林院侍講卒於京邸所著有連龕集四十餘卷并史館諸傳藁

安志

游東昇字曰生臨川人順治戊戌進士聞母變兼程歸以未視含殮為恨哀毀委頓遂不起人咸惜之東昇性介特復好赴人緩急里人陷冤獄將鬻妻以賂吏立為白其事所著有綠映樓集姪恢博通經史著深

柳堂詩三十卷

府志

張應勝字鴻溟臨川人順治辛丑進士康熙九年任廣西梧州府北流縣知縣十三年十月孫延齡據廣西省叛勝調集鄉勇為守禦備偽將唐朝鳳以兵來攻勝率衆登埤分兵拒守三日夜勢危不支守備常某開西門出降勝出南門督戰力孤不敵為賊所害家丁五人吏何涵俱死之雍正三年遣官

諭祭

府志

劉嘉猷金谿人由舉人授新建學教諭陞候官知縣甲

寅耿精忠叛力拒偽命遂被害事聞贈僉事

予祭葬

安志

原良字鳴善樂安人篤志聖賢之學年八十餘猶孜孜講習或諷以過勞良曰人如魚書如水水所以養魚魚不勞于水書所以養心心不勞于書也所著有三山存業十編步為草二十四卷桑綢彙紀三卷詩集六卷

安志

江球字宜笏金谿人康熙辛未進士授庶常改御史歷

官左副都御史天性孝友撫異母弱弟愛踰己子人
無間言言動以禮自持與人溫溫可親然清介特甚
不可干以私卒卯典北闈試癸巳典武闈會試凡因
緣請託悉禁不得發在官三十年淡若寒素以老成
謹慎著年六十有八卒

撫州新志

江西通志卷八十二